

清

史

稿

清史稿

本紀二十二

穆宗本紀二

六年丁卯春正月己未任賴諸匪竄孝感德安官軍失利總兵張樹珊死之壬戌復靖遠內寅革官文總督召來京以李鴻章爲湖廣總督調李瀚章爲江蘇巡撫以劉崑爲湖南巡撫己巳張錫嶸剿捻匪於西安魚化鎮死之劉松山軍大捷命喬松年專辦陝西軍務辛未命左宗棠爲欽差大臣督辦陝甘軍務賞劉典三品銜幫辦軍務乙亥哈密回匪竄巴里坤官軍擊退之訥爾濟病免以伊勒屯爲巴里坤領隊大臣丙子命徐繼畲仍在總理各國事務衙門行走管新設同文館事務己卯官軍復鎮雄二月乙酉朔劉銘傳追剿任賴于鍾祥失利鮑超進擊大敗之庚寅命李鴻章督軍赴豫壬辰京師疫甲午擢劉松山爲廣東陸路提督丁酉陝回馬生彥等降減廣州屬徵收米折銀十九萬有奇著爲令乙巳桂軍復泗城庚戌以丁寶楨爲山東巡撫辛亥洮州復陷壬子雲貴總督勞崇光卒以張凱嵩代之三月丁巳鄂軍剿賊于蘄水失利道員彭毓橘

等死之癸亥總兵段步雲軍潰於鄆州戊辰鮑超累乞病諭仍赴黃州乙亥命倭仁在總理各國事務衙門行走辭不允丁丑諭李雲麟等安頓新疆難民辛巳曹克忠軍復洮州壬午回匪馬占鰲等犯西甯是春免浙江仁和等場被撥通課山西平定等處民欠倉穀夏四月丁亥允琉球國子弟入監讀書予鮑超病假戊子何瑄軍復哈密己丑周祖培卒癸巳吉林馬賊平丙申日斯巴尼亞使來換約壬寅劉松山大破捻回於同州丙午贈哈密殉難扎薩克郡王伯錫爾親王建祠德勒克多爾濟病免命麟興爲烏里雅蘇台將軍調榮全爲參贊丁未瞻對番目大蓋折布伏誅庚戌貴德回匪叛陷廳城五月甲寅哈密回匪竄玉門官軍擊退之以早命恤難民育嬰孩拚暴露贈陣亡者家屬戊午諭廣購書籍並重刊御纂欽定經史頒發各學己未郭寶昌劉松山兩軍破張總愚於朝邑免郭寶昌遣戍辛酉命曾國藩爲大學士駱秉章協辦大學士丙寅詔清理庶獄丁卯桂軍復荔波義甯戊辰詔求直言覈減宮廷用款己巳擒匪渡運河予丁寶楨嚴議庚午賊竄長垣官軍擊退之癸酉以剿賊無功褫曾國荃

頂戴與李鶴年下部議嚴諭李鴻章戴罪圖功京師地震庚辰董福祥陷陝西  
甘泉六月甲申總理各國事務衙門言俄人窺伺新疆下大學士尙書左都御  
史會總理王大臣妥議丙戌申禁州縣浮收漕糧甲午倭仁乞病罷職務仍以  
大學士直弘德殿乙未官軍敗擒匪於即墨庚子順直久旱饑賑卹之允鮑超  
回籍辛丑李鴻章檄劉銘傳潘鼎新等軍防運河扼膠萊命成祿節制黃祖淦  
王仁和兩軍以畿內亢旱撥閩廣贛釐捐三十萬浙閩海關洋稅三十五萬備  
賑需癸卯甘回陷陝西華亭旋復之丁未免昌平例貢果品己酉自三月不雨  
以來上頻祈雨至是日雨是月免陝西乾州等屬災撥額賦秋七月己未雨陝  
軍復甘泉庚午永定河決己卯以擒匪過膠萊河諭各路扼守河運兩防奪丁  
寶楨職仍留任是月免湖南晃州被擄通賦八月丙戌停奉天冬圍戊子湖北  
匪首劉漢忠伏誅庚寅命黎培敬會辦貴州剿撫及屯田事宜壬辰奉軍剿平  
孤山法庫等處賊匪辛卯署貴州提督趙德光剿賊於安平死之內申穆隆阿  
等軍剿梟匪於文安失利濟陽土匪作亂剿平之丁酉迤西回犯姚州戊戌貴

州巡撫張亮基開缺嚴議命曾璧光署之布政使嚴樹森以逗遛褫職壬寅召陳國瑞來京丙午以淮楚各軍所至騷擾諭李鴻章嚴申軍律己酉裁熱河木稅庚戌創建福建船塢九月壬子允左宗棠調曹克忠赴陝丙辰賴任諸匪犯運河牛師韓軍擊退之丁巳河狄西甯回衆投誠庚申停山東例貢辛酉安置額魯特游牧於額爾齊斯河甲子總理各國事務衙門言預籌修約事諭曾國藩等各抒所見以聞己巳命丁日昌赴上海辦理義國換約壬申撫恤巫山被水災民丁丑命榮全與棍噶札拉參籌辦哈薩克剿撫機宜己卯命馮子材赴左江專辦南太軍務賑襄陽等府災民冬十月癸未諭各路統兵大臣及各督撫嚴申軍律甲申察哈爾都統色爾固善卒以庫倫辦事大臣文盛代之乙酉以張廷岳爲庫倫辦事大臣丙戌陝軍復甯條梁及宜君飭席寶田軍赴沅州統援黔軍務壬辰迤西回陷定遠大姚癸巳汪元方卒命沈桂芬在軍機大臣上學習行走丙申曾國荃病免以郭柏蔭爲湖北巡撫蘇鳳文爲廣西巡撫賑恤山東被水災民乙巳派美使蒲安臣往有約各國辦理中外交涉己酉回匪

陷寶雞正寧旋復之十一月庚戌朔命道員志剛郎中孫家穀往有約各國充辦理交涉事務大臣壬子劉銘傳等軍剿賊賴榆大捷任柱伏誅癸丑以梟匪蔓延褫劉長佑職仍責自效命官文署直隸總督丙辰陝軍剿捻洛川遇回匪失利提督李祥和死之癸亥張總愚陷延川綏德甲子增設布倫托海辦事大臣以李雲麟爲之明瑞爲幫辦福濟爲科布多幫辦甲寅劉銘傳軍剿賊於諸城大捷丁丑陝軍復延川綏德十二月壬午張總愚竄吉州左宗棠趙長齡均褫職留任成祿剿回匪於肅州失利總兵黃祖淦死之癸未賞陳國瑞頭等侍衛隸左宗棠軍劉銘傳等剿賊於壽光大捷迤西回陷祿豐廣通元謀己丑官軍復吉州壬辰直隸梟匪平甲午賞劉長佑三品頂戴命率所部回籍永定河隄工合龍丙申命蔣益澧以按察使候補隸左宗棠軍率楚勇回籍丁酉駱秉章卒劉松山等敗張總愚於洪洞調吳棠爲四川總督以馬新貽爲閩浙總督李瀚章調浙江巡撫丁日昌爲江蘇巡撫戊戌淮軍剿賊高郵大捷獲賴文光等誅之辛丑東捻平加資李鴻章曾國藩世職賞劉銘傳英翰及郭松林楊鼎

勤善慶世職有差復晉國荃頂戴壬寅以左宗棠督師入晉命庫克吉泰喬松  
年劉典督辦陝西軍務甲辰命楊占鼐署甘肅提督接辦西路軍務戊申左宗  
棠檄喜昌劉松山等赴磁州迎剿諭張曜劉銘傳等會剿己酉命鄭敦謹往山  
西查辦事件是月免浙江仁和等場未墾竈課雲南嵩明等屬歉收額糧是歲  
朝鮮琉球入貢

七年戊辰春正月庚戌朔擒首李九等率衆降於盱眙詔誅之遣散餘衆命朱  
鳳標協辦大學士乙卯回匪復陷正甯丙辰喜昌等擊張總愚於河內大捷西  
甯回陷北川李雲麟乞病不許以錫綸爲布倫托海幫辦大臣辛酉張總愚北  
竄定州保定戒嚴官文左宗棠均褫職留任諭玉亮統神機營兵剿賊壬戌張  
總愚犯清苑劉松山郭寶昌等軍繞賊前剿之予優叙陳國瑞宋慶張曜均以  
軍至保定達賴請宥裏塘犯東登工布死罪允之命賈柏等設圍防總局癸亥  
諭令天津洋槍練軍各隊赴河間與山東軍聯絡防剿甲子李鴻章遣周盛波  
等軍北援赴左宗棠赴保定以北督剿命恭親王會同神機營王大臣辦巡防

壬申允英翰入衛畿疆命統牛師韓軍駐黃河以南飭程文炳軍赴河間會剿  
癸酉張總愚陷饒陽旋復之賈植以病致仕乙亥命左宗棠總統各路官軍二  
月辛巳官軍復渭源癸未命恭親王節制各路統兵大臣戊子回匪復陷甯條  
梁己丑回匪竄伊克巴沙爾官軍擊退之禡趙長齡陳湜職遣戌壬辰陝軍復  
寶雞癸巳滇軍解鎮雄圍迤西回陷楚雄乙未豫皖各軍敗張總愚于東鹿庚  
子左宗棠李鴻章等軍勦賊迭破之回匪陷懷遠神木壬寅白泥岫苗匪降乙  
巳以朝鮮請嚴邊禁命延煦奕榕赴奉天會都興阿勘展邊事宜三月壬子張  
凱嵩乞病諭責其逗留規避褫職回匪陷鄜州劉典駐三原督勦癸丑以劉嶽  
昭爲雲貴總督岑毓英爲雲南巡撫乙卯陝軍復鄜州癸亥諭庶吉士散館仍  
試詩賦戊辰張總愚竄延津封邱劉松山郭寶昌擊敗之辛未命沈桂芬爲軍  
機大臣乙亥命朱鳳標爲大學士丙子迤西回陷易門丁丑張總愚竄滑縣擊  
敗之是月免直隸安州等處漕地逋賦夏四月己卯朔哈密回陷五堡官軍擊  
退之甲申張總愚陷南皮丁亥諭左宗棠李鴻章丁寶楨等督各軍於運河東



西分路防剿己丑苗匪何正觀降庚寅陝軍剿回匪於邠州失利譚玉龍死之  
己巳永定河決乙未召都興阿來京戊戌黎平苗犯晃沅各境官軍擊退之辛  
丑甯條梁回擾鄂爾多斯游牧貝子札那格爾濟擊退之回匪犯哈密伊勒屯  
等會擊退之癸卯賜洪鈞等二百七十人進士及第出身有差是月免四川各  
土司三年租賦閏四月戊申朔迤西回竄陷昆陽新興晉甯呈貢嵩明戊午回  
匪復陷神木癸亥陝軍復延長甲子董福祥投誠諭立功自贖乙丑回匪踞烏  
審旗分擾準噶爾旗偏托克托城丁卯程文炳陳國瑞劉松山等軍擊張總愚  
于高唐荏平博平大捷賊竄東光己巳回匪再陷慶陽及寧州合水知縣楊炳  
華死之辛未命都興阿爲欽差大臣會同左宗棠李鴻章剿捻調遣春喜陳國  
瑞張曜宋慶四軍崇厚幫辦軍務五月戊寅劉松山等軍剿張總愚於鹽山海  
豐大捷己卯創設長江水師置岳州漢陽湖口瓜州四鎮總兵官癸未陝軍擊  
退竄邠鳳回匪壬辰北山土匪犯延安官軍失利副將劉文華等陣沒庚子滇  
軍復元謀武定祿勸羅次是月免湖南晃州被擾通賦六月己未郭松林等剿

擒於臨邑濱州陽信大捷諭水師嚴扼運防辛酉桂軍復歸順癸亥金匪竄甯  
古塔界官軍勦平之甲子陝軍克宜川丙寅張總愚犯運河岸官軍擊敗之擒  
衆多降戊辰又擊之於商河大捷乙亥李雲麟視職查辦命明瑤爲布倫托海  
辦事大臣浙江海塘工竣秋七月丁丑獨直魯豫被擾各州縣田賦己卯春壽  
以欺飾視職壬午撫卹滄州等處被擾難民乙酉張總愚赴水死擒匪平加李  
鴻章左宗棠太子太保銜鴻章以湖廣總督協辦大學士丁寶楨英翰崇厚並  
加太子少保銜復官文銜翎管劉銘傳一等男郭松林一等輕車都尉賞宋慶  
善慶二等輕車都尉劉松山黃馬褂三等輕車都尉郭寶昌張曜溫德勒克西  
騎都尉黃翼升加一雲騎尉復陳國瑞提督世職餘升叙有差命惇親王祭告  
定陵允彭玉麟回籍終制丙戌召左宗棠李鴻章入覲丁亥榮澤河決辛卯毛  
昶熙言軍務漸平宜益思寅畏旋御史張緒楷疏請保泰持盈及時講學並嘉  
納之壬辰允左宗棠請資遣降衆回籍癸巳武陟沁河堤決乙未調曾國藩爲  
直隸總督馬新貽爲兩江總督以英桂爲閩浙總督命彭玉麟赴江皖會籌長

江水師事宜戊戌諭蘇皖豫魯各屬修圩築飭鄉團庚子予宋儒袁燮從祀文廟援黔川軍復龍里貴定川軍剿越徭夷匪勝之俘其酋勒烏立授曾璧光貴州巡撫辛丑布倫托海變民竄烏隴古河德勒克多爾濟卒癸卯撫恤榮鄭災民甘回擾白水郃陽陝軍擊退之甲辰援黔湘軍復甕安八月乙巳朔礪御史德泰職以奏請修理園庭也庫守貴祥妄陳希利發黑龍江爲奴永定河決己酉諭明珠等規復布倫托海舊制命馬新貽兼辦理通商事務大臣壬子延安土匪扈彰降癸亥諭左宗棠兼顧山西軍務戊辰諭吉林嚴定開墾圍荒界限辛未諭金順專辦援陝軍務是月免皖蘇魯豫鄂被擾積年通賦九月壬午官軍復慶陽甲申肅州回攻敦煌官軍擊退之諭伊勒屯等籌辦巴里坤屯田乙酉援黔川軍會復平越辛卯命延煦出關查辦奉天展邊事宜癸巳滇軍復晉甯呈貢是月免浙江橫浦等場歉收隨課冬十月丁未回匪犯涇州靈臺擊退之乙卯文麟抵哈密諭興辦蔡巴什湖等處屯田丙辰穆圖善克河州賑濟南武定水災丁巳戌李雲麟黑龍江戊午命李鴻藻仍直弘德殿及軍機庚申以

守科布多功加土爾扈特郡王凌札棟魯布親王銜己巳黔苗復陷興義旋復之十一月甲戌援黔川軍復麻哈丁亥涼州總兵周盛波以不戢所部褫職回匪擾鄂爾多斯等旗竄榆林諭定安等截勦壬辰諭除吏胥積弊己亥黔軍克都勻賞張文德黃馬褂庚子臺灣英領事縱洋將掠船踞營署焚局庫勒兵費諭總署詰辦飭英桂等邊員交涉壬寅熱河匪平免吉林雙城堡被水屯田租賦十二月甲辰朔川軍勦西昌夷匪連捷各夷部降援黔湘軍復天柱丙午回匪犯包頭蒙軍失利丁未熱河匪首彌勒僧格伏誅甲寅以曾國藩言川私病楚諭籌止川鹽濟楚章程撤局停稅丁巳滇軍復激江庚申申諭各省禁種罌粟壬戌黔苗竄擾河池官軍擊退之乙丑諭朝審緩決三次以上者並減等永定河工竣戊辰麒麟慶能以慶春爲熱河都統庚午劉松山剿賊大理川大捷壬申截鄂餉二十一萬賑河南災是月免江蘇荒地糧賦山東泰安河南汝甯等屬被擾通糧是歲朝鮮入貢

八年己巳春正月癸酉朔停筵宴丁丑川湘黔桂各軍會勦苗匪黔軍復長寨

戊寅滇軍克富民己丑劉松山等軍擊土回各匪敗之於清洞成祿克肅州與楊占鼐並賞黃馬褂甲午榮工合龍丙申劉松山軍敗賊于靖邊董侍有等以鎮靜堡及靖邊降迤西回犯昆明岑毓英等擊退之辛丑雷正綰克涇州董家堡二月戊申命袁保恒督辦西征糧餉三月癸酉朔林自清戕興義知縣提督陳希祥誘誅之賞希祥黃馬褂甲戌援黔湘軍復鎮遠府衛兩城戊寅甘肅提督高連陞部兵變戕連陞部將周紹濂擊逆黨於同官殄之乙酉諭督撫於克復州縣慎選牧令拊循流亡庚寅回匪陷磴口甲午吐魯番回匪犯哈密官軍迭敗之乙未桂軍克憑祥己亥懿旨大婚典禮力崇節儉是春免江蘇山陽直隸安州等屬災擾額賦兩淮富安等場通欠竈課夏四月癸卯朔迤西回陷楊林營劉嶽昭退守曲靖嚴責之乙巳麟興以畏事褫職以福濟爲烏里雅蘇臺將軍文碩爲布倫托海辦事大臣己酉雷正綰黃鼎軍復鎮原慶陽援黔川軍復壘安己未援黔湘軍會復清江庚申允劉銘傳乞病辛酉免陳湜遣成是月免山東東昌等屬逋賦五月庚辰援黔湘軍復施秉進攻黃飄賊壘失利按察

使黃潤昌道員鄧子垣提督劉長槐死之壬午回匪陷激江甲申杜暖爾等軍大破賊於杭錦旗辛卯命李鴻章赴四川察辦吳棠劾案申誠岑毓英任用通賊練目苛斂民捐以馬如龍爲雲南提督丙申官軍剿匪於保安大捷匪首袁大魁等伏誅自春正月不雨至於是月上頻禱祈丁酉雨六月辛亥援軍會克尋甸壬子命董恂崇厚辦理奧斯馬加換約甲寅永定河決戊午予黃飄死事提督榮惟善總兵羅志宏等世職加等辛酉武英殿災癸亥倭仁徐桐翁同龢請勤修聖德以弭災變上嘉納之丙寅諭督撫考課農桑庚午回匪犯阿拉善定遠營蒙兵失利秋七月辛未朔日有食之癸酉張曜等軍收回匪於察漢淖爾命吳坤修赴沿江各屬撫卹災民甲戌滇軍復嵩明克白鹽井甲申桂軍會越南軍克九蒔洛陽等隘乙酉諭錫綸賑卹額魯特人衆丙戌朝鮮請鴨綠江北禁游民建屋墾田趙都興阿等妥辦壬辰何璟軍敗賊于木壘河等處是月免晃州被擾通賦八月庚子朔俄商船泊呼蘭河口求吉黑內地通商諭總署按約止之禁軍民私與貿易癸卯內監安得海出京丁寶楨奏誅之黔匪復陷

都勻丙午桂軍會復越南高平庚戌申諭約束太監壬子官軍勦平杭錦旗屬  
竄回癸丑甯夏官軍勦賊失利副將方大順陣亡戊午棍噶札拉參軍復布倫  
托海賊首張魁等伏誅己未官軍勦達拉特旗竄匪殄之是月賑浙江杭州各  
屬湖南安鄉等縣水災九月庚午高臺勇潰礮成祿職留任壬申撥京餉三十  
萬濟武漢等屬工賑甲戌馬化龍復叛襲陷靈州官軍復威戎堡水洛城戊寅  
滇軍復易門壬午免暹羅補歷年貢品庚寅烏魯木齊匪竄哈密何瑄等擊敗  
之乙未福建新造第一輪船成命崇厚勘驗戊戌諭福濟等額魯特各安舊居  
僧衆居阿爾泰山南俗衆居青格里河冬十月庚子劉松山收回匪於吳忠堡  
等處辛丑金順又敗之於納家牕命楊占鰲署甘肅提督辦肅州善後事宜法  
使羅淑亞與其水師提督以兵船赴贛鄂川省查教案諭所在按約待之乙巳  
雷正綰黃鼎收回匪於固原鹽茶丁未命毛昶熙沈桂芬在總理各國事務衙  
門行走辛丑命文碩等會勘布倫托海分界事宜董恂辦理美國換約甲寅滇  
軍復楚雄南安定遠劉嶽昭移軍昆明己未哈密官軍剿西路回匪大捷甲子

鳳凰城匪首王慶等伏誅乙丑劉松山軍復靈州是月賑雲南水災直隸旱災十一月丙子桂平教匪孫上汶等謀逆捕誅之丁丑裁新設布倫托海辦事大臣庚辰賑江甯水災癸未免科布多屬貢貂甲申滇軍復昆陽丙戌甘軍復靖遠庚寅永定河口合龍乙未命文碩來京改奎昌辦理分界是月免直隸東明被淹被擾安徽無爲等州縣衛被水通賦十二月庚子援滇川軍克魯甸乙巳劉松山軍攻金積堡總兵簡敬臨等死之乙卯披楞侵占哲孟雄各地廓爾喀與唐古特構嫌諭恩麟防維開導布魯克巴內閔並諭恩麟解釋撫綏丁巳越南匪平諭蘇鳳文嚴申邊禁癸亥賑畿南災是歲朝鮮越南琉球入貢

九年庚午春正月丁卯朔停筵宴癸酉滇軍復祿豐甲戌甘軍擊敗援賊於王家驢己卯回匪陷定邊癸未神武門木庫火詔修省庚寅回匪陷安定陝軍復定邊甲午馬德昭留辦潼關防務二月辛丑劉松山督勦金積堡回匪中砲卒賞道員劉錦棠三品卿銜接統其軍以俄官往齊齊哈爾吉林商界務諭富明阿德英據約待之母遷就乙巳回匪分竄安邊清澗陝軍擊走之丙午又分竄



花馬池榆林宋慶軍勦之戊申官軍擊敗米脂竄匪壬子命李鴻章赴陝西督辦軍務甲寅回匪竄同官宜君陝軍剿敗之丙辰法使因教案藉兵要挾諭各疆吏通商大臣迅結交涉事宜辛酉署夏各堡降回復叛三月丁卯剿回匪竄準噶爾旗馬玉崑擊敗之辛巳雷正綰以疏防峽口視職留營諭誠西征各軍貪功銳進乙酉滇軍復彌渡賓川麗川緬甸辛卯回匪分擾岐鳳李輝武擊敗之夏四月甲辰譚廷襄卒五月庚午命崇實赴貴州會同曾璧光查辦教案癸酉始允英國設置沿海各口電綫甲戌援黔川軍克黃飄白堡等苗寨庚寅天津人與天主教啟衅焚毀教堂嚴斃法領事命曾國藩與崇厚會商辦理乙未諭疆吏飭禁播謠惑衆保護通商傳教各區李鴻章督軍入關請調郭寶昌軍允之命崇厚爲出使法國大臣以成林署三口通商大臣是月免直隸安州等屬通賦六月戊戌奎昌赴塔爾巴哈台與俄使勘辦立界壬寅賽音諾顏部蒙兵剿回匪失利丁未滇軍復威遠己酉命彭玉麟赴江南會同沿江督撫整頓長江水師庚戌甘軍敗回匪於鞏昌乙卯永定河決庚申以疏防民教啟釁視

天津知府張光藻知縣劉傑職下部治罪辛酉滇軍復姚州癸亥命毛昶熙會同曾國藩查辦教案曾國藩言善全和局爲保民之道備禦不虞爲立國之基諭旨嘉勉命丁日昌赴天津幫辦洋務秋七月戊辰以琿春邊務事繁加協領副都統銜爲定制丙子法使羅淑亞以曾國藩不允府縣論抵回京諭國藩迅緝原兇從速辦結丁丑召崇厚還命毛昶熙署三口通商大臣甲申周盛傳等勦散北山餘匪丙戌諭曰海上水師與江上水師截然不同欲捍外侮圖自強非二十年之久未易收效然因事端艱鉅畏縮不爲則永無自強之日近年內外臣工值事急時徒事張皇禍患略平又爲苟安之計即剏立戰守章程而奉行不力使朝廷謀議均屬具文積習因循焦憂曷釋茲聞滬甯兩廠輪船告成馬新貽丁日昌英桂沈葆楨各擇統將出洋窮年練習以備不虞廣東亦應籌備輪船瑞麟李福泰務切實辦理將校有熟諳風濤沙線者隨時擇保卽山野中或長於海戰亦當隨時物色量材超擢各督撫其統籌全局以副委任庚寅南路甘軍復渭源狄道是月免兇州被擾通賦八月丁酉汝陽人張汝祥刺殺馬

新貽命曾國藩爲兩江總督李鴻章調直隸總督李瀚章爲湖廣總督戊戌設黃河水師庚子北山匪首李凡覺伏誅壬寅命張之萬會同魁玉訊張汝祥己酉召毛昶熙還命李鴻章會曾國藩查辦天津教案癸丑桂軍剿平安邊河陽賊匪梁添錫伏誅允越南進方物及馴象己未命李成謀爲新設輪船統領九月戊辰演軍復新興庚午諭崇實仍赴遵義辦教案甲戌治天津民教啟釁罪張光藻劉傑遣戍誅逞兇殺害之犯十五人是秋川東荊州熱河被水賑撫之冬十月乙未沈葆楨丁憂命百日後仍經理船政丙申命劉銘傳督辦陝西軍務諭嚴禁四川州縣苛派撥款續賑北山難民辛丑以江北漕船阻淺由陸路轉運臨清甲辰天津製造局成庚戌日本請立約通商允總署遴員議約辛亥免科布多貢貂壬子裁三口通商大臣命直隸總督經理如南洋大臣例給欽差大臣關防嚴諭疆吏慎密交涉有漏洩者立誅之內辰以水旱疊見詔修省戊午移周盛傳軍衛畿輔陝回禹生彥等竄平番官軍失利提督張萬美等死之庚申設直隸津海關道劉錦棠各軍克漢伯等堡合圍金積堡閏十月乙丑

俄使倭退嘎哩來京庚午湘潭會匪平乙亥滇軍復永北鶴慶鎮南楚雄回匪陷烏里雅蘇台丙子永定河合龍諭曾國藩籌河連戊寅越南吳亞終等伏誅十一月癸巳命鄭敦謹會鞠張汝祥獄尋定讞磔張汝祥于江甯丁酉回匪竄涼州副將謝元興陣沒王仁和擊退之辛丑援黔湘軍復台拱戊申福濟榮全以匪入烏里雅蘇台褫職留任命曾國藩兼通商大臣庚戌甘肅總兵周東興侵賑命斬於軍前庚申劉坤一以漏洩密諭褫職留任十二月甲子諭嚴禁河工偷減侵蝕諸弊辛未滇軍復鄧川浪穹回目馬源發戕提督丁賢發等捕誅之是冬免貴州興義等州縣衛陝西綏德等州縣災撥通賦是歲朝鮮入貢十年辛未春正月辛卯朔停筵宴壬辰官軍克河西王曠賊壘賞金順黃馬褂加張曜一雲騎尉乙未黔軍平貴定等處賊壘克都勻賞提督林從泰總兵何雄輝黃馬褂己亥諭馮子材赴太平進勦牧馬諒山匪壬寅官文卒是月免直隸安州等屬被水額賦二月壬戌劉錦棠等軍克金積堡匪首馬化龍等伏誅加左宗棠一騎都尉賞劉錦棠雲騎尉黃馬褂開復雷正綰處分及陳湜原官

賞黃鼎金運昌黃馬褂置就撫陝回於華亭之化平川設通判都司以綏靖之前知靈州彭慶章坐爲賊主謀處斬壬午獲叛將宋景詩誅之丁亥調江蘇按察使應寶時赴津籌辦日本通商事命瑞常爲大學士文祥協辦大學士三月癸巳金順等軍克甯夏匪首馬萬選伏誅己丑滇軍復激江克江那土城匪首馬和等伏誅辛丑普使李福斯致國書以德意志各國及自主之三漢謝城共復一統受尊稱爲德意志皇帝復書賀之丁未以倭仁爲文華殿大學士瑞常爲文淵閣大學士自春初至於是月上連祈雨庚戌雨夏四月丙寅援黔湘軍復新城巖明司等城克高坡等苗寨己巳甯夏納家牯回衆降己卯陝回竄擾平番礮伯官軍擊退之辛巳倭仁卒甲申賜梁燿樞等三百二十三人進士及第出身有差築大沽北塘礮臺乙酉福濟革職以金順爲烏里雅蘇台將軍丙戌回匪復竄擾賽音諾顏部焚掠固爾班賽汗等處五月庚寅朔雨乙未左宗棠請禁絕回民新教不許戊戌苗酋聞國興等降入寨等城俱復壬寅回匪擾烏拉特杜嘎爾薩薩布軍合擊之丙午援黔湘軍復丹江凱里等城賞蘇元春

黃馬褂己酉以李世忠尋仇鬪很陳國瑞演劇生事褫世忠職降國瑞都司併勒回籍畀有司管束辛亥鄭親王承志有罪褫爵逮訊命李鴻章辦日本商約應實時陳欽爲幫辦乙卯金順乞假守制葬親不許己未滇軍復雲龍六月壬戌太白晝見益陽等處會匪平己巳陝回白彥虎結西甯回衆擾河州庚午黔軍克永甯鎮甯歸化苗寨破郎岱水城各同寨乙亥命瑞麟爲大學士仍留兩廣總督任己卯阜陽匪擾沈邱汝陽官軍捕誅之辛巳以廣東盜賊橫行諭飭嚴緝丁亥德宗生於醇邸戊子賑天津災秋七月己丑朔桂軍勦越南竄匪克長慶斬匪首趙雄才壬辰杜嘎爾軍勦賊於布拉特勝之甲午永定河復決丙申穆圖善赴北山勦賊金連昌軍剿烏拉特竄匪勝之丁未河內沁河決乙卯昌圖賊匪竄擾都興阿遣軍剿平之八月壬申以副都統慶至製封鄭親王甲戌桂軍克安世賊寨追剿太原竄匪蘇國漢赴廣東乞降丁丑詔各省設局收養流寓孤寡九月丙申革高郵征糧弊習丁酉甘軍克康家厓要隘趨榮全赴伊犁給劉銘傳假三月壬寅諭奉吉整頓吏治嚴緝盜賊命恩錫往上海辦興

國換約丁未喬松年等會堵侯家林決口是秋賑順直各屬及荷澤等州縣災  
免濮州被水兗州被撥逋賦冬十月戊午朔達爾濟以撤營縱賊褫職逮治命  
曹克忠接統劉銘傳軍赴肅州防剿庚申以湖南匪變命李鴻章查辦壬辰命  
景廉爲烏魯木齊都統癸未詔免伊犁被脅官吏軍民等罪以參領貢果爾接  
統達爾濟軍十一月癸巳甘軍克河州禹得彥等降丁未西甯回匪竄烏拉特  
及中衛張曜軍擊退之乙卯肅州回匪復犯敦煌文麟援剿之十二月辛未予  
先儒張履祥從祀文廟丁丑番山匪徒曾大鵝幅等作亂捕誅之是歲朝鮮琉  
球越南入貢

十一年壬申春正月丙戌朔停筵宴己丑以紀年開秩諭減刑文碩以乞病褫  
職辛卯桂軍復越南從化克銀山癸巳甘軍連破甘坪大貝坪等處賊壘進攻  
太子寺庚子黔軍克清平黃平重安辛丑援黔湘軍克黃飄白堡苗寨辛亥命  
侍郎崇厚太常寺少卿夏家鎬在總理各國事務衙門行走二月庚申允江蘇  
辦米試行河運漕白二糧仍由海運丙寅曾國藩卒贈太傅戊辰褫劉銘傳職

以前功仍留一等男爵庚午起彭玉麟巡閱長江水師甲申侯家林決口合龍  
越南匪首蘇國漢等伏誅是月賑四川各屬災三月乙酉朔黔軍復貞豐內戊  
甘軍剿太子寺回匪失利提督傅先榮徐文秀死之褫提督楊世俊黃馬褂降  
參將甲午免達爾濟等罪仍褫職效力丁酉以奉匪擾朝鮮境嚴緝之辛丑瑞  
常卒是春免湖北黃陂直隸安州甘肅河州等處被擾通賦夏四月丙辰回匪  
竄定邊靖邊陝軍擊退之己未西甯回目馬占魁陝回崔三米拉溝回目治成  
林等先後乞降丙寅停准關傳辦活計諭內務府力求樽節己卯通政司副使  
王維珍疏陳先意承志孝思維則予嚴議尋褫職是月免貴州興義等屬被擾  
通賦五月甲申朔日有食之免熱河騰岡旗民租課三年乙酉自三月初旬慈  
禧太后弗豫月餘不視朝至是御史李宏謨請勅召對諭責其冒昧嚴飭之癸  
巳徐占彪軍剿肅回屢捷左宗棠劾成祿糜帑遷延命穆圖善查辦乙未貴州  
苗匪平賞席寶田騎都尉丙申陝回宋全德等降予伊犁殉難已革尙書陳孚  
恩暨其眷屬旌卹加等庚子命李鴻章爲大學士仍留直隸總督任乙巳滇軍



克永平及雲南六月甲午朱鳳標致仕命文祥爲大學士全慶協辦大學士丁  
卯諭停本年秋審朝審句決以單懋謙協辦大學士秋七月癸未朔滇軍會克  
興義已丑免廓爾喀例貢賑達木蒙古及三十九族被災兵民戊戌回匪竄擾  
甯夏西路及阿拉善旗官軍擊退之己亥直隸呈進瑞麥御史邊寶泉疏論之  
諭李鴻章勤恤民隱補救偏災毋銷張瑞應庚子永定河北下汛溢是月免湖  
南晃州被撥逋賦八月庚午截江北漕米十萬餘石賑畿輔被水災民癸酉金  
順以遷延罷長順署烏里雅蘇臺將軍辛巳以單懋謙爲大學士九月癸未滇  
軍克趙州蒙化並大理上下關賞楊玉科李維述黃馬褂左宗棠言地產瑞麥  
瑞穀諭却之乙未冊立皇后阿魯特氏自王大臣以次推恩加賚頒詔天下覃  
恩有差永定河工合龍丙午允彭玉麟乞病回籍仍命每年巡閱長江水師庚  
戌榮全請令慶符招撫鄉民英廉等馬隊駐庫爾喀喇烏蘇酌募民勇允之丁  
巳甘肅潰勇首犯馮高等伏誅己未加上兩宮皇太后徽號戊辰廣西隆安岑  
溪土匪西隆苗匪平壬寅諭統兵大臣約束委員治騷擾逾限者罪允恭親王

請復軍機處舊制丙子何璟奏免以張樹聲署兩江總督十一月乙酉朝鮮匪船越境侵擾都興阿等水師緝剿之回匪擾哈密東山官軍剿勝之禁殿廷鄉會考試請託冒替己卯瓊州土匪平誅匪首何亞萬等辛卯滇軍剿館驛等踞匪進東迤南肅清乙未肅回竄扎薩克汗各旗官軍擊走之黔軍會克新城下江苗匪亂張文德軍剿除之全黔底定丙申擒匪竄擾太湖水師剿平之允軍民入哥老會者自首免罪丁酉申禁各省種罌粟辛丑劉錦棠等軍剿回匪大捷丁未陝軍剿陝北二道河等處竄匪殄之李鴻章奏設招商局試辦輪船分運江浙漕糧十二月己未駐藏幫辦德泰坐事褫職回旗丙辰諭吏部兵部理藩院親政後各署有請旨及軍務摺片均用漢文丁卯釋田興恕回丙子左宗棠乞病溫旨不許己卯禘祭太廟是歲朝鮮入貢

十二年癸酉春正月辛巳朔官軍擊回匪於那瑪特吉幹昭敗之內戌以李宗義爲兩江總督兼通商大臣辛酉成祿以苛捐誣叛褫職逮問趣金順接統其軍甲辰滇軍克大理日酋杜文秀楊榮蔡廷棟等伏誅賞岑毓英黃馬褂騎都

尉世職開復劉嶽昭處分賞楊玉科騎都尉乙巳兩宮皇太后以親政屆期懿旨勉上祇承家法講求用人行政毋荒典學勵廷臣及中外臣工公忠盡職宏濟艱難丙午上親政詔恪遵慈訓敬天法祖勤政愛民己酉諭內務府核實撙節於歲費六十萬外不得借支二月庚戌朔軍機大臣六部九卿會議黃運兩河辦法諭李鴻章悉心籌辦奏聞下詔修省求直言諭直省舉賢才杜侵蝕戊午加上兩宮皇太后徽號翌日頒詔覃恩有差劉錦棠軍克大通向陽堡庚午以謁東陵命悼親王等留京辦事乙亥金順軍抵肅州剿回匪敗之三月癸未上奉兩宮皇太后謁東陵丁亥回鑾免蹕路經過本年額賦己丑大通巴燕戎格及五工撒拉各回衆降西甯匪首馬桂源等伏誅庚寅上奉兩宮皇太后還宮丙申回匪白彥虎等竄甘州命議定各國公使覲見禮節榮全乞病不許庚子以英廉爲塔爾巴哈台參贊大臣丁未滇軍克順甯是春免江蘇邳州陝西鄜州等屬被擾通賦夏四月乙卯設廉州北海關丙辰日本換約成乙丑回匪竄阿拉善旗及阿畢爾米特諭定安遣軍會防兵夾擊己巳官軍克肅州塔爾

灣賊巢五月庚寅滇軍克雲州丁酉允各國公使覲見癸卯成祿交刑部治罪  
丙午命成瑞署烏魯木齊提督六月壬子幸瀛臺日使副島種臣假使倭良  
嘜哩美使鏤斐迪英使威妥瑪熱福哩荷使費果蓀覲見於紫光閣呈遞國書  
庚申嚴趣金順出關丁卯甘軍復循化匪目馬玉連等伏誅閏六月甲申李鴻  
章覆陳黃連兩河淮徐故道難復請仍海運其舊河涸地酌量升課議行丙戌  
朱鳳標卒滇軍克騰越予岑毓英一等輕車都尉賞劉嶽昭黃馬褂楊玉科一  
等輕車都尉以雲南軍興十有八年郡縣多爲賊蹂躪詔免十一年以前積欠  
糧賦並永遠停徵濟軍釐穀諭劉嶽昭慎選牧令察吏安民甲午京畿久雨上  
祈晴丙申詔查各省畝捐釐捐及丁漕違制者次第豁除庚子甘軍剿白彥虎  
等于敦煌失利副將李天和等死之永定河決免阿爾泰烏梁海七旗貢貂秋  
七月辛亥桂軍剿西甯西隆匪平之甲子賑順天災是月免山東青城被水新  
舊額賦八月丁丑朔都興阿乞病慰留之辛巳直隸連河隄決榮全復以病乞  
免不許富和有罪褫職戊子白彥虎等陷馬蓮井營堡召劉嶽昭入覲以岑毓

英兼署雲貴總督壬辰白彥虎等圍哈密犯巴里坤官軍失利乙未諭景廉督軍赴援調錫綸爲烏魯木齊領隊大臣以明春爲哈密幫辦大臣是月賑直隸各屬永順府屬暨公安水災九月丙寅命軍機大臣會刑部審擬成祿罪癸酉永定河合龍冬十月丙子朔御史沈淮疏請緩修圓明園諭令內務府僅治安佑宮爲駐蹕殿宇餘免興修己亥官軍克肅州匪逆馬文祿伏誅上詣兩宮皇太后賀捷庚子諭功命左宗棠以陝甘總督協辦大學士加一等輕車都尉復金順職賞還黃馬褂予徐占彪穆圖善雲騎尉十一月己未越南王疏請會剿河陽興化山西宣光邊地諸匪諭劉長佑馮子材議奏辛酉法越構衅法兵破河內省越匪擾北甯越人求援諭瑞麟飭軍由欽州出關會桂軍援剿之甲子御史吳可讀請將成祿明正典刑己巳岑毓英奏整頓吏治營伍並請撤勇停捐自雲南始詔嘉之庚午疏濬運河壬申成祿論斬吳可讀坐刺聽朝政降調十二月甲申回匪竄擾烏梁海等部錫綸軍追剿敗之戊子以磨勘順天舉人徐景春試卷荒謬考官尙書全慶都御史胡家玉等降黜有差辛卯命額勒和

布赴烏里雅蘇台查辦事件丙申賞故提督劉松山一等輕車都尉命張曜金順分軍西進壬寅以慈禧皇太后四旬慶典推恩近支王公及中外大臣賚叙有差是歲朝鮮入貢

十三年甲戌春正月乙巳朔停筵宴甲寅湘軍剿古州苗匪平之丙辰命編修張英麟檢討王慶祺直弘德殿辛酉以劉坤一胡家玉互參降坤一三品頂帶褫職留任家玉鐫五級調川癸亥諭築東明長隄己巳官軍援沙山子擊回匪勝之賞福珠哩黃馬褂戊寅回匪擾巴里坤境明春等會剿之內申以法取越南地越匪擾山西偏演疆諭岑毓英部署邊防禁京師私鑄丁酉上奉兩宮謁西陵三月甲辰還宮乙巳賑奉天災民丙午命寶鋆協辦大學士己酉修海寧石塘辛酉諭肅清貴州功復陶茂林提督賞提督何世華等世職辛未日本兵艦泊廈門諭沈葆楨統兵輪往相機籌辦命李鴻章與秘魯公使會議華工事宜夏四月甲戌詔撥帑十萬撫卹烏里雅蘇臺災擾部落丁丑上幸瀛臺單懋謙因病乞休允之覲見俄使布策等於紫光閣辛巳上幸圓明園還宮癸未瑪

那斯回匪犯奎屯等處官軍進剿失利景廉兵援之內戌日本兵船抵臺灣登岸與生番尋衅命沈葆楨辦海防兼理各國事務大臣江廣沿海各口輪船以時調遣辛卯長順緣事褫職命額勒和布爲烏里雅蘇台將軍慶春爲察哈爾都統托倫布爲科布多參贊大臣丁酉賜陸潤庠等三百三十七人進士及第出身有差辛丑景廉再乞病不許五月壬寅朔法越和議定諭邊將安輯內遷難民壬子上幸圓明園還宮日本攻臺灣番社丁巳以慈禧太后聖節予在京旗官六十以上者恩賞停本年秋審朝審人犯勾決己未彗星見乙丑詔賑奉天災民丙辰允沈葆楨請建臺灣海口礮臺撫番社撤疲兵戊辰日本師船游弋福建各海口日使柳原光前與總署王大臣商臺灣兵事六月乙亥諭飭總兵孫開華接辦廈門防務己卯召楊岳斌曾國荃閻敬銘趙德轍丁日昌鮑超蔣益澧郭嵩燾來京壬午烏索寨降衆復叛滇軍剿平之癸未允李鴻章請以徐州唐定奎軍渡海赴臺乙酉諭戶部樽節不急之需豫籌海防經費諭沈葆楨部署南北路防守丁酉命翁同龢仍直弘德殿秋七月丁未李鶴年請閩省

陸路選立練軍議行庚戌瑪納斯回匪犯西湖官軍擊退之壬子命左宗棠爲大學士仍留陝甘總督任景廉爲欽差大臣督辦新疆軍務金順幫辦軍務庚申覲見比使謝恩施等於紫光閣甲子內務府大臣貴賓以任郎中時於知府李光昭報効木植欺罔奏陳嚴議褫職乙丑馬賊陷寧古塔旋復之允福建軍餉借用洋欸二百萬由海關稅分年抵還己巳停修圓明園工程庚午諭責恭親王召對失儀奪親王世襲降郡王仍爲軍機大臣並革載澂貝勒郡王銜白彥虎等犯濟木薩官軍擊敗之八月辛未朔懿旨復恭親王世襲及載澂爵銜訓勉之諭修葺三海工程力求撙節丙戌河南蝗戊子李光昭論斬庚寅諭各省整頓捕務乙未命左宗棠督辦西征糧臺轉連事宜以內閣學士袁保恆爲幫辦詔各省酌裁釐局禁種罌粟丁酉上幸南苑戊戌閱御前王大臣乾清門侍衛射己亥上行圍九月庚子朔上幸涼陘臺撤圍辛丑上幸涼陘臺閱神機營兵壬寅閱王大臣侍衛等射丁未瑞麟卒以英翰爲兩廣總督庚戌日本續遣大久保利通來與總署王大臣論臺灣番社兵事丙辰寧古塔匪首王文奎



伏誅辛酉王大臣與日使成議退兵回國給日本難民卹金及臺灣軍費共五十萬乙丑賈植卒丙寅諭李鴻章等於總署條奏海防練兵簡器造船籌餉用人持久諸事詳議以聞十月辛未以慈禧皇太后四旬萬壽復劉銘傳提督己卯上慶賀禮成賞廢員職銜免王公文武官處分餘進叙有差庚辰卹廣東颶災癸巳命廣壽夏同善赴陝西查事己亥上不豫命李鴻藻代閱章奏十一月甲辰命恭親王代繕批答清文摺件丁未賑徐海水災己酉命內外奏牘呈兩宮披覽以寶鋆爲大學士壬子日本退兵癸丑冬至祀天圓丘遣醇親王代頒部帑百五十萬築石莊戶隄工甲寅上以兩宮調護康吉崇上徽號詔刑部及各省罪犯分別減等庚申議行河南練軍甲子以石莊戶隄難就允丁寶楨請於賈莊一帶建壩築隄十二月辛未詔蠲免雲南被擾荒地錢糧十年甲戌李經羲病免以劉坤一署兩江總督上疾大漸崩於養心殿年十九慈安皇太后慈禧皇太后召惇親王奕訢恭親王奕訢醇親王奕譞孚郡王奕譞惠郡王奕詳貝勒載治載澂公奕謨御前大臣伯彥訥謨帖奕劻景壽軍機大臣寶鋆沈

桂芬李鴻藻內務府大臣英桂崇綸魁齡榮祿明善貴寶文錫直弘德殿徐桐  
翁同龢王慶祺南書房黃鈺潘祖蔭孫詒經徐郃張家駒入奉懿旨以醇親王  
之子承繼文宗爲嗣皇帝光緒元年二月戊子皇后阿魯特氏崩三月己亥上  
尊諡曰繼天開運受中居正保大定功聖智誠孝信敏恭寬毅皇帝廟號穆宗  
五年三月庚午葬惠陵

論曰穆宗冲齡卽阼母后垂簾國運中興十年之間盜賊剗平中外乂安非夫  
宮府一體將相協和何以臻茲洎帝親裁大政不自暇逸遇變修省至勤也聞  
災蠲卹至仁也不言符瑞至明也藉使蘄至中壽日新而光大之庸詎不與前  
古媲美顧乃奄棄臣民未竟所施惜哉

清史稿

本紀二十三

德宗本紀一

德宗同天崇運大中至正經文緯武仁孝睿智端儉寬勤景皇帝諱載灃文宗嗣子穆宗從弟也本生父醇賢親王奕譞宣宗第七子本生母葉赫那拉氏孝欽皇后女弟同治十年六月誕於太平湖邸第十三年食輔國公俸十二月癸酉穆宗崩無嗣慈安皇太后慈禧皇太后召惇親王奕訢恭親王奕訢醇親王奕譞孚郡王奕譔惠郡王奕詳貝勒載澂鎮國公奕謨暨御前大臣軍機大臣內務府大臣弘德殿南書房諸臣等定議傳懿旨以上繼文宗爲子入承大統爲嗣皇帝俟嗣皇帝有子即承繼大行皇帝乙亥王大臣等以遺詔迎上於潛邸謁大行皇帝几筵丙子上奉慈安皇太后居鍾粹宮慈禧皇太后居長春宮從王大臣請兩宮皇太后垂簾聽政皇太后訓敕稱懿旨皇帝稱諭旨詔停三海工程乙卯停各省貢方物壬午頒大行皇帝遺詔懿旨醇親王奕譞以親王世襲罔替翰林院侍講王慶祺有罪褫職定服制縗素百日仍素服二十七月

伯彥訥謨祜景壽俱管理神機營癸未詔悼親王恭親王孚郡王諭旨章奏勿書名召對宴賚免叩拜甲辰詔以明年爲光緒元年丁亥上大行皇帝尊諡曰繼天開運受中居正保大定功聖智誠孝信敏恭寬毅皇帝廟號曰穆宗戊子懿旨封皇后爲嘉順皇后皇貴妃爲敦宜皇貴妃諭中外臣工於用人行政據實直陳飭臣民去奢崇實敕各督撫求民疾苦慎選牧令考覈屬吏並修明武備壬辰頒遺詔於朝鮮甲午禁內務府官結納太監乙未內務府大臣貴寶文錫礪職丙申諭左宗棠督剿河州叛回丁酉祫祭太廟是月免浙江被災鹽場竈課

光緒元年乙亥春正月戊戌朔免朝賀己亥命吏部尙書英桂兵部尙書沈桂芬並協辦大學士戊申予明故藩朱成功建祠臺灣追諡忠節庚戌勅沈葆楨勘辦琅璫築城建邑籌開山撫番事宜辛亥祈穀於上帝清江設廠收養徐海被水飢民內閣侍讀學士廣安疏請廷臣會議大行繼嗣頒鐵券斥之丙辰越南匪黨竄滇邊巡撫岑毓英剿平之戊午上御太和殿即皇帝位頒赦詔開恩

科辛酉申諭督撫進賢懲貪除貪緣奔競二月丁丑諭刑部清釐積案戊寅祭大社大稷豫親王本格攝行由是大祀皆遣代至十二年冬至圓丘祀天始親詣壬午英繙譯官馬嘉禮被戕於雲南劉錦棠等復河州甲申臺灣生番亂提督唐定奎剿之丙戌賜琉球國王緞匹文綺及貢使緞匹戊子嘉順皇后崩三月戊戌朔日有食之己亥上大行皇帝尊諡廟號壬子山東賈莊河工合龍丙辰越南匪黨蘇亞鄧等伏誅乙丑召景廉回京授左宗棠欽差大臣督辦新疆軍務以金順爲烏魯木齊都統副之是月普免各省欠糧免江西山西同治六年以前逋賦夏四月丁卯朔享太廟庚午命穆圖善調所部馬隊來京隸神機營駐南苑己卯唐定奎克臺灣南路番社壬辰以沈葆楨爲兩江總督兼通商大臣督南洋海防李鴻章督北洋海防五月戊戌興直隸水利防軍墾鹹水沽稻田庚子大考翰詹擢吳寶鋈鴻機鈕玉庚孫詒經一等餘升黜有差甲辰停浙江貢絲玉簪鐲並停各織造傳製諸品劉嶽昭督攻越南復同文土州等城戊申上嘉順皇后尊諡曰孝哲嘉順淑慎賢明憲天彰聖教皇后辛亥工部

神庫火壬子刑部科房火命李瀚章往雲南查馬嘉禮案薛煥繼往會按之乙卯夏至祭地於方澤六月戊辰吉林將軍奕榕褫職遣戍庚午奉天匪據大東溝作亂崇實討平之停甘肅例貢甲午免直隸同治十年以前民欠旗租並補徵稅謄旨命醇親王與御前大臣舉各署諸綠營勇營紀律及侍衛可任統兵者壬午以穆宗帝后梓宮奉移山陵預戒有司毋備御道旋禁苛擾癸巳秋七月戊戌免直隸同治六年以前通賦並稅糧庚子永定河決諭各省詳理京控諸獄貸太原等縣倉穀濟民食癸卯賞劉典三品京堂幫辦陝甘軍務免湖北米穀釐金甲辰祕魯換約成諭總署會籌保護華工丙午慈安皇太后聖壽節停筵宴壬戌命李鴻章丁日昌與英使威妥瑪就商馬嘉禮案候補侍郎郭嵩燾候補道許鈴身充出使英國大臣八月戊寅免陝西被兵額賦庚辰免長蘆兩淮鹽政應進物品庚寅命丁日昌督福建船政九月丁酉諭穆圖善整飭吉林吏治旗營甲辰申定外人遊歷內地條約吳棠督勦叙永廳竄匪辛亥免梓宮經過大興等州縣額賦十之五遵化十之七賞平毀麥田籽種銀並免蠲贖

錢糧及旗租甲寅奉安梓宮於隆福寺乙卯上謁諸陵閱普祥普陀峪工程丙辰閱惠陵工程丁巳奉兩宮皇太后還宮庚申至自隆福寺辛酉諭王凱泰區處臺灣生番癸亥劉長佑剿敗越南匪首黃崇英周建新伏誅冬十月甲子朔享太廟癸酉慈禧皇太后聖壽停筵宴甲戌允丁寶楨請於煙台威海衛登州府築礮臺設機器局己卯弛浙江南田島禁聽民耕作庚辰賞京師貧民棉衣銀每歲皆如之叙永匪李增元等爲亂提督李有恒剿平之癸未賞八旗各營一月錢糧歲以爲常湖南新化衛永匪亂總兵謝晉鈞提督趙聯陞剿平之丁亥委散秩大臣吉和內閣學士烏拉喜崇阿使朝鮮封李熙子拓爲世子十一月戊戌岑毓英克鎮雄大寨匪首鞠占能伏誅劉嶽昭以玩泄褫職丁未予郎中陳蘭彬以京堂候補充出使美日祕大臣乙卯奉天大通溝匪平戊午冬至祀天於圓丘己未免朝賀庚申祔穆宗后神牌於奉先殿十二月丙寅奉安神御於壽皇殿丁卯除盛京養息牧廠地額賦甲戌懿旨皇帝典學內閣學士翁同龢侍郎夏同善授讀於毓慶宮御前大臣教習國語滿蒙語言文字及

騎射大學士文祥請解機務慰留之戊寅免浙江被災新舊賦課甲申祈雪壇廟辛卯禘祭太廟是歲朝鮮琉球緬甸入貢

二年丙子春正月癸巳朔免朝賀戊戌諭各省宣講聖諭廣訓癸卯免仁和等場未墾竈蕩課糧癸丑黔匪陷下江尋復之內辰祈雨自是頻祈雨辛酉四川蠻匪平二月乙丑詔自本年孟夏始未親政以前太廟時享及禘祭大祀俱前一日親詣行禮己卯免海沙蘆瀝等場竈額課壬午鄧川匪首羅洪昌項和伏誅免浙江通賦庚寅陽萬土州判岑潤清作亂嚴樹森剿平之壬辰東鄉匪聚衆抗官三月丙申以旱故詔清庶獄己亥予吳贊誠三品京堂督辦福建船政甲寅已革都司陳國瑞遣戍黑龍江丙午免陝西六十六州縣逋賦丁未詔以慈禧皇太后四旬萬壽停本年秋決貴州四腳牛賊巢及六峒匪平戊申以雨澤愆期諭內外臣工直言闕失夏四月乙亥停陝西進方物免淮揚等屬同治六年以前逋賦壬午上始御毓慶宮讀書丙戌賜曹鴻勛等三百二十四人進士及第出身有差戊子蘇熱達熱畢噶爾瑪薩哈進哀表頒敕答之並賜緞匹



五月乙未文祥卒乙巳以近畿亢旱直隸山東暨河南河北等府小民艱食諭長官撫卹並捕蝗蝻丙辰御史潘敦敏請更上孝哲皇后諡號予嚴議尋褫職閏五月辛酉朔賑近畿旱災庚午賑福建水災辛未以旱敕修省壬申孝陵大碑樓災自春正月不雨至於是日雨甲申陞州齊匪平乙酉諭劉坤一防海練兵亟圖整頓六月庚寅朔諭文煜等嚴懲傳習邪術壬辰騰越練軍踞城作亂並陷順甯雲州丁酉以李鴻章爲全權大臣赴烟台與英使威妥瑪議結馬嘉禮案庚子安徽蝗戊申開雲南實官捐例辛亥以江皖魯豫匪擾諭沈葆楨等分兵搜剿解散脅從丁巳總兵孔才進攻瑪納斯斬匪首馬得明等是月賑南豐南昌福建水災是夏免淮陽等屬通賦盛京同治六年以前通賦長蘆各場同治十年以前竈課直隸同治十年以來通賦秋七月辛酉上兩宮皇太后徽號辛未復准鹽楚岸引地甲戌東鄉匪首袁廷蛟伏誅辛巳劉長佑潘鼎新復騰越各城匪首蘇開先伏誅戊子馬嘉禮案議結免案內官所坐罪八月辛卯劉錦棠金順擊敗回酋白彥虎復烏魯木齊迪化城尋復昌吉呼圖壁景化各

城辛丑許鈴身改出使日本大臣丁未賑浙江水災辛亥賑江西水災孔才等復瑪納斯北城九月戊午朔予上元江甯兩縣一門殉難三十五家百九十五人旌卹建坊壬戌順天增設粥廠己巳定出使各國章程以四川州縣民教訟閱諭魁玉等持平訊斷壬申諭文煜等嚴緝福建江西安徽等省邪教匪黨冬十月丙午賑皖北旱災命景廉李鴻藻在總理各國事務衙門行走甲寅召榮全來京以金順爲伊犁將軍丁巳賑口北山東安徽江北饑十一月丁卯金順錫綸克瑪納斯南城匪首何碌馬有財伏誅壬午以新疆北路平發帑汰遣金順軍甲申截漕一萬石並提倉穀濟蘇常留養災民十二月戊子命侍講何如璋充出使日本大臣甲辰命督撫嚴查州縣母匿災各省民教案持平審理戊申賑江北淮海災己酉回匪竄穆科布多參贊大臣保英派兵遲緩切責之乙卯免杭嘉松各場未墾地竈課

三年丁丑春正月丁巳朔免朝賀戊午命以都御史景廉爲軍機大臣命前藏濟龍呼圖克圖於達賴未出世以前掌商上事務給達善名號癸亥以英桂爲

體仁閣大學士載齡以吏部尙書協辦大學士免洪澤湖灘欠租二月戊子穆  
坪夷匪伏誅己丑申諭各省墾荒田禁械鬪慎舉劾整營規賑直隸山東山西  
河南安徽江西福建還籍飢民己亥免湖北通賦庚子懿旨梓宮在殯皇帝沖  
齡除朝賀大典外其頒慶宴外賓典禮暫緩舉行辛丑復准鹽引地壬寅刑  
部平反浙江民人葛品連獄巡撫楊昌濬侍郎胡瑞瀾褫職知府以下論罪有  
差申諭各省理刑期情眞罪當毋輕率三月丁巳朔上釋服以山陵未安仍禁  
官中宴會演劇辛未免華陰被水糧課三年癸酉以劉錫鴻充出使德國大臣  
賑流陽災民辛巳除臺灣府屬雜餉賑內山饑番夏四月辛卯常寧祀天於園  
丘甲午馬邊猓夷結野番黑夷出擾魁玉等剿之乙未免鄆縣被水通賦戊戌  
劉錦棠等克七克騰木關展復吐魯番滿漢兩城尋攻克達坂及託克遜賊壘  
安集延曾帕夏自殺己亥總兵張其光攻臺灣率芒番社克之庚子貸義州旗  
戶籽種銀辛丑賑貴陽地震災壬寅昭通廣南匪作亂官軍討平之癸卯以災  
區緩徵吏胥舞弊諭各省整頓旌安貧樂道高郵增生韋弼諸甲辰越南遣使

進方物資其國王緞匹庚戌賜王仁堪等三百二十九人進士及第出身有差  
是月江蘇安徽蝗五月戊辰日本阻琉球入貢遣來使歸國癸酉山西旱留京  
餉二十萬賑之甲戌監利會匪王澤漳等作亂伏誅撥帑銀一百二十萬解西  
征糧臺戊寅賑福州水災壬午懿旨以皇上萬壽值齋戒期更定六月二十六  
日行慶賀禮著爲令山西大旱巡撫曾國荃請頒匾額爲禱以非故事不許諭  
曰禱惟其誠當勤求吏治清理庶獄以迓和甘六月戊子詔工部仁壽之子羅  
布藏塔布克甲木錯卽作爲達賴喇嘛之呼畢勒罕毋庸掣瓶辛卯廣東北江  
堤決連州大水詔賑撫災民戊戌先是穆宗廟位次懿旨命大臣會議醇親  
王復請定久遠至計少詹事文治鴻臚寺卿徐樹銘少卿文碩內閣侍讀學士  
鍾佩賢司業寶廷並有陳奏至是仍命王大臣等詳議以聞並命李鴻章妥議  
丙午以災後疊見誠臣工修省庚戌上萬壽御乾清宮受賀秋七月丁巳撥海  
防經費助山西賑己未惇親王等議上穆宗帝后神牌位次請于太廟中殿東  
西各四楹遵道光初增奉先殿後殿龕座修葺改飾並從醇親王請自今以往

不援百世不祧之例戊辰免江甯上元等縣被災額賦十之三己巳留京餉漕折銀賑河南饑丁亥諭各省修農田水利壬辰撥天津練餉十萬濟山西賑甲午免臺灣同治十年供粟及糯米易穀庚子諭劉坤一等整頓廣東捕務戊申撥銀四十萬賑山西河南災並留江安漕糧輸山西河南各四萬石備賑九月甲寅羅田匪首陳子鼐伏誅戊午命前侍郎閻敬銘往山西查賑己未申禁山西種罌粟改植桑棉辛酉撥山東冬漕各八萬石續賑山西河南災甲子予漢儒河間獻王劉德從祀文廟乙丑詔求直言丁卯命李鶴年往河南查賑戊辰減緩山西河南應協西征軍餉庚辰加賑祥符等縣災民口糧辛巳賑興化府屬風災冬十月壬辰賑三姓雹災庚子諭各省安撫轉徙饑民甲辰免三姓被災銀穀加賑陽曲等縣災民口糧乙巳增設內城粥廠庚戌劉錦棠進復喀喇沙爾庫車兩城尋復阿克蘇及烏什城十一月癸丑詔戒各部院玩愒因循乙卯開山東運漕新河丁巳諭督撫府尹講求吏治十二月辛卯緩赫哲貢貂庚子豫免山西河南被災州縣來歲糧是冬連祈雪撥來年江鄂漕米凡十二萬

石賑山西發帑金賑陝西是歲山陝大旱人相食

四年戊寅春正月辛未賑河南饑命郭嵩燾兼出使法國大臣西軍復葉爾羌喀什噶爾和闐回衆降己卯諭各省清理詞訟二月辛巳朔修成都都江堰壬午諭興北方水利乙酉命署兵部左侍郎王文韶爲軍機大臣庚寅諭舉州縣能實行荒政者壬辰新疆平匪首白彥虎遁入俄羅斯論功進左宗棠二等侯劉錦棠二等男予提督余虎恩等世職有差甲午諭清庶獄丁酉賑呼蘭災己亥下詔罪己賑山西河南饑丙午瘞災地遺骸庚戌免侯官被水丁糧三月甲寅諭被災各省試行區田法壬申賑直隸饑撥察哈爾牧羣馬三千匹給貧民耕作甲戌諭內務府減經費除浮冒戊寅英桂致仕是月河南雨四月壬午沈葆楨請罷武科斥之壬辰賑廣東風災五月庚戌朔諭直省廣植桑茶命載齡爲體仁閣大學士管工部事全慶以刑部尙書協辦大學士辛未以崇厚爲出使俄國大臣六月丙戌免陝西通賦庚寅嚴私鑄禁甲午賑臺灣風災庚子諭刑部嚴定州縣侵賑罪秋七月乙卯雲南官軍復耿馬土城辛未命禮部右侍

郎王文韶順天府府尹周家楣在總理各國事務衙門行走壬申嚴命案延玩處分甲戌以曾紀澤爲出使英法大臣丁丑免平陽蒲解絳今歲秋賦是月賑金衢嚴等府浮梁等縣水災八月己卯永定河決丙戌沁河決戊子賑崇安浦城水災九月丁巳諭東南疆吏豫救水患清釐保甲防會匪煽惑災民癸亥賑山西旱免陽曲等縣通賦及徐溝等縣秋糧戊辰賑藍田水災丙子修樊口江堤冬十月壬午廣西在籍總兵李揚才叛命馮子材勦之免通海各處淮安四衛通賦並雜課丁亥賑濮范壽陽水災癸巳沁河復決賑奉天水災乙未北新倉火戊戌臺灣後山加禮宛等社就撫縛獻番目誅之免貴州被兵新舊額賦十一月丙辰修北運河隄辛酉白彥虎寇邊劉錦棠擊敗之癸亥李揚才据越南長慶楊重雅剿之己巳詔督撫整躬率屬責軍機大臣勿避嫌怨院部大臣力戒因循甲戌冬至祀天於圓丘乙亥停朝賀十二月己丑詔永罷捐輸事例是歲免仁和鹽場通課者二朝鮮廓爾喀入貢

五年己卯春正月乙巳朔停筵宴乙丑申諭停籌餉捐例修高瀋隄辛未賑山

西饑二月壬午吉州知州段鼎耀以吞賑處斬癸未詔復河運甲午諭山西清  
理荒田編審丁口均差徭己亥梓宮奉安山陵禁有司科派擾累賑文安等州  
縣水災三月丙午賊目鍾萬新與李揚才合犯宣光馮子材會師越南擊之壬  
子免梓宮所過大興通三河薊遵化額賦庚申頒吉嚙呼圖克圖敕書并賚哈  
達蟒緞布魯特回曾合安集延賊曾寇邊劉錦棠敗之乙丑奉兩宮皇太后謁  
東陵己巳謁昭西孝東諸陵庚午葬穆宗於惠陵孝哲后祔癸酉至自東陵閏  
三月乙亥穆宗神主祔太廟頒詔天下丁亥李揚才踞者嚴己丑修襄陽沔陽  
天門江隄庚寅吏部主事吳可讀於東陵仰藥自盡遣疏請豫定大統懿旨王  
大臣等集議以聞乙未命三品卿銜李鳳苞爲出使德國大臣夏四月戊申修  
通州北運河癸丑予吳可讀卹典懿旨以可讀原疏及會議摺徐桐寶廷張之  
洞等摺並前後諭旨均錄存毓慶宮免河南被災州縣漕銀及通課己巳先是  
嶧縣知縣朱永康以謀殺委員高文保論戍尋下廷議至是奏上詔以罪浮於  
法改論死五月丙子夏至祭地於方澤己卯免兩淮秦海各場通課壬午河南



蝗已亥官軍剿平者嚴賊是月賑清河安東風災山西兩階文西和地震歷十  
有三日六月壬子刑部言東鄉獄事誣叛妄殺已革知縣孫定揚提督李有恒  
論死尋文格丁寶楨並坐奪職命發帑二十萬撥丁釐銀三十萬濟山西賑需  
已未諭言事諸臣交部議奏之事不得撓越陳奏亦不得雷同附和相率瀆陳  
普免山西積年民欠倉穀烏拉特阿拉善等旗蝗甲子懿旨允醇親王奕譞家  
居養疾解職務賑邠乾漢鳳地震災七月庚辰賑直隸水災戊子以星變地震  
求直言諭各省積穀免絳蒲陽城被災夏課鹽稅庚寅復海運八月戊申祭大  
社大稷詔各省舉文武堪備任使者壬子致仕學士單懋謙卒癸丑賑博山  
等州縣水災乙卯江皖各屬蝗乙丑賑階文西和地震及水災九月甲戌賑直  
隸水災壬辰加上文宗穆宗尊諡己亥重慶等府縣地震賑之冬十月辛丑朔  
免曲沃等州縣歉收額賦乙卯免奉天旗民站丁地課抵例賑口糧丁巳諭水  
師並習陸戰癸亥賑秀山等處水災己巳英桂卒免齊齊哈爾黑龍江墨爾根  
屯糧並原貸籽種十一月乙亥李揚才伏誅己卯冬至祀天於圜丘庚辰停朝

賀壬午沈葆楨卒甲申以劉坤一爲兩江總督兼南洋大臣庚寅詔責崇厚與俄人定伊犁約擅自回京所議條約廷臣集議壬辰免山西災重州縣稅契銀己酉懿旨廷議俄約覆奏下王大臣等再議醇親王並預議以聞乙卯褫崇厚職下獄辛酉諭修社倉興社學己未免永濟等州縣秋糧丙寅給祭太廟詔洗馬張之洞會商俄約戊辰修山東運河是歲朝鮮廓爾喀入貢

六年庚辰春正月己巳朔停筵宴辛未命曾紀澤爲出使俄國大臣改議條約甲戌諭查營伍虛額占役乙亥西林苗匪平丙子命前工部尙書李鴻藻仍爲軍機大臣壬午尋甸匪亂官軍討平之己丑詔中外舉人才疆吏飭邊備海防命河北道吳大澂幫辦吉林軍務通政使劉錦棠幫辦新疆軍務辛卯定崇厚罪論斬癸巳戶部奏籌餉十條詔各省推行是月除山西各屬荒地丁銀免仁和等場荒蕩夏稅二月乙巳永免榆次貢瓜壬戌甘肅總兵蕭兆元侵蝕軍糧論斬三月甲戌賑順直水災乙亥左宗棠出屯哈密金順扼精河張曜劉錦棠分進伊犁己卯免山西洪洞忻州各屬荒賦三年或四年庚子祀天於圓丘復

設科布多昌吉斯臺霍呢邁拉扈等八卡倫官兵丙午三姓設廠造輪船甲寅  
隋州番匪哈力等作亂伏誅壬戌賜黃思永等三百三十三人進士及第出身  
有差乙酉調李長樂爲直隸提督統武毅四營鮑超爲湖南提督召來京五月  
丙子賑洛陽等縣雹災乙酉隋州番匪古巴旦等伏誅丙戌以徇俄人請貸崇  
厚死仍繫獄六月丁酉朔賑福建水災癸卯昇李鴻章全權大臣與巴西議約  
甲辰禁徵糧浮收勒折丙辰賑廣州等處水災丁巳免交城等縣荒地缺課命  
曾國荃督辦山海關防務七月壬申召左宗棠來京督辦關外事宜癸酉出崇  
厚於獄癸未賑揚州風災甲申命前浙江提督黃少春辦理浙江防務八月己  
亥巴西商約成戊申召劉銘傳來京庚戌南北洋初置電綫壬子江蘇捕蝗癸  
亥朝鮮來告與日本交聘九月己巳命浙江提督吳長慶幫辦山東防務節制  
防軍庚午免永濟貢柿霜辛未允朝鮮派工匠來天津學造器械壬申賑蒲城  
等處災壬午給曾國荃病假命岐元節制各軍癸未減涼肅番族馬貢己丑賑  
資陽清溪災庚寅印度進樂器並所撰樂記資以金寶星癸巳除拉林旗佃租

賦冬十月丙午察木多帕克巴拉胡圖克圖進貢物以哈達大緞賜之己酉東  
明河決辛亥命前吏部尙書毛昶熙在總理各國事務衙門行走甲寅賑圍場  
海龍城及荷澤水災甲子懿旨醇親王管理神機營事務十一月乙丑朔命侍  
講許景澄爲出使日本大臣己巳以全慶爲體仁閣大學士靈桂以吏部尙書  
協辦大學士甲申冬至祀天於圓丘丙戌江華盜匪平癸巳免永平等屬逋賦  
十二月丙午命楊昌濬會辦新疆善後丙辰免文安被水額賦庚申懿旨神機  
營選弁兵赴天津學製外洋火器辛酉濬漕運河道是冬數祈雪是歲朝鮮喀  
爾喀入貢

七年辛巳春正月甲子朔停筵宴沈桂芬卒癸酉敕各省慎舉孝廉方正乙亥  
達賴喇嘛遣人進哈達佛香命獻惠陵賚以哈達緞匹戊寅免浙江仁和等場  
荒坍竈蕩各府州縣衛荒地新墾地六年逋課及額糧辛卯越南請官兵助剿  
積匪不許免海陽六年逋賦壬辰命左宗棠爲軍機大臣管兵部兼總理各國  
事務衙門行走除貴筑興義八寨水銀等廠逋課二月癸巳朔命李鴻章籌山

海關防務節制諸軍以曾國荃爲陝甘總督戊戌日本使臣穴戶璣來議琉球條款不協敕海疆戒備己酉修襄陽老龍石堤辛亥修濟陽壩工甲寅通政司參議劉錫鴻以誣劾李鴻章褫職三月甲子除錦州官田租賦丁卯改築焦山都天廟礮臺己巳命李鳳苞兼出使義和奧大臣黎庶昌爲出使日本大臣辛未慈安皇太后不豫壬申崩於鍾粹宮癸未上太行皇太后尊諡曰孝貞慈安裕慶和敬儀天祚聖顯皇后夏四月癸巳雷波夷匪平己亥命吳大澂督辦吉林三姓甯古塔琿春防務兼屯墾免陝西咸甯等六十二廳州縣通賦辛丑頒孝貞顯皇后遺誥於朝鮮己酉曾紀澤與俄國改訂新約成丙辰永禁明陵私墾己未懿旨恭親王醇親王會同左宗棠李鴻章議興畿輔水利初置琿春副都統庚申賑臺北地震災五月壬戌朔日有食之官軍擊散越南積匪丁卯詔疆臣於命盜重獄按月冊報遲逾者罪之戊寅罷烏里雅蘇臺屯田己丑賑鹽源水災賞鄭藻如三品卿爲出使美日祕大臣六月己亥彗星見詔修省丙辰萬壽節停朝賀己未命李鴻藻協辦大學士癸亥賞學行純篤廣東在籍知縣

朱次琦舉人陳澧並五品卿銜戊子召劉坤一來京以彭玉麟署兩江總督兼南洋大臣賑階州等處地震災閏七月壬辰諭各省統戢釐卡出入酌定撤留癸巳賑兩淮泰州各場竄災甲午免檢社等縣五年逋賦己亥命金順督辦交收伊犁事宜錫綸爲特派大臣與俄人會商界務尋命升泰並爲特派大臣甲辰命鮑超復裁所部營伍乙巳初置呼倫貝爾副都統庚戌禁州縣諱飾重獄是月賑江蘇福建四川水災陝西雹災八月甲子頒帑金二萬給養霍碩特流民辛巳以皇太后疾愈命刑部停秋決其緩決屆三次與未屆三次分別差減之癸未孝貞顯皇后奉安免所過州縣租賦命劉錦棠爲欽差大臣督辦新疆軍務張曜副之丙戌除伯都訥磽地賦額全慶致仕九月甲午賑甯海等縣水災乙未允彭玉麟解職仍巡閱長江劉坤一罷以左宗棠爲兩江總督兼南洋大臣丙午葬孝貞顯皇后於定東陵丁未汝甯光州捻匪平己酉再減金壇漕額十分之一分四釐賞附居青海番衆八族青稞歲八百餘石辛未孝貞顯皇后神牌附太廟丙辰賑臺灣颶風災是月甘肅臺灣地震冬十月己巳皇太后

聖壽節停筵燕庚午昭通匪陸松山等作亂官軍討斬之癸酉以靈桂爲體仁閣大學士以刑部尙書文煜協辦大學士甲戌法人踞越南北境諭滇粵合籌弭衅甲申詔舉行察典勿有舉無効賑泰和等縣水災丁亥安徽已革提督李世忠擅繫貢生吳廷鑑等裕祿上其狀詔處斬十一月庚寅免吉林被水官莊及伯都訥地租丙申施南會匪楊登峻伏誅丁酉潯吳淞淞沙戊戌廣西果化土州匪首趙蘇奇伏誅賑貴縣等處水災甲辰賑臺灣澎湖災十二月乙亥賞恭親王子載潢不入八分公醇親王子載洸奉恩輔國公是月免浙江各府州縣衛荒廢及新種賦課仁和等場竈課免安州任縣文安潞地額糧除吉林荒地租賦是冬頻祈雪是歲朝鮮越南入貢

八年壬午春正月戊子朔免朝賀辛卯修洞庭西湖隄自去年十一月不雨至於是月己亥雪庚戌修漳沱新河及子牙河隄二月己未江蘇文廟火壬戌以朝鮮占種吉林邊地開墾歷年令其領照納租隸籍癸丑申嚴門禁更定稽察守衛章程壬午申禁私伐明陵樹木乙酉先是江甯疑獄命麟書薛允升往勘

之至是訊明委員胡金傳以酷刑論斬諭疆吏詳覈重獄勿冤溢三月乙未命左副都御史陳蘭彬在總理各國事務衙門行走庚戌李鴻章母憂連疏請終制許之命百日後駐天津練軍仍權理通商事務辛亥法越構兵諭李鴻章左宗棠張樹聲劉長佑籌邊備乙卯築浙江海口礮臺是月俄人歸我伊犁是春免陽曲通糧大城額賦及累年通賦夏四月丙辰朔永免山西荒地稅糧戊午免陝西前歲通賦己巳法人入越南東京起曾國荃署兩廣總督甲戌全慶卒甲申朝鮮請遣使來駐京師不許惟予已開口岸貿易五月丙戌朔諭金順經畫伊犁西北邊界以長順勘分西南以沙克都林札布勘分戊子賑汀州風災壬辰召劉長佑來京以岑毓英署雲貴總督乙巳初置吉林分巡道庚戌直隸蝗六月丁巳翰林院侍讀溫紹棠奏稱時事多艱請皇太后勵精勤政詔以皇太后尙未康復飭之命整頓八旗官學乙亥清安言俄兵至哈巴河諭長順詳慎勘界以杜覬覦戊寅朝鮮匪亂命張樹聲勦平之尋提督丁汝昌往援吳長慶率師東渡癸未朝鮮焚日本使館日本以兵船至命李鴻章赴天津部署水



陸軍往察辦是月賑安徽水災浙江江西水災秋七月乙酉朔三巖野番就撫  
乙巳懿旨損秋節宮費賑安徽浙江江西三省災丁未吳長慶軍入朝鮮執其  
大院君李是應初置新疆阿克蘇喀什噶爾分巡道癸丑朝鮮亂平八月丙辰  
諭科布多界務崇厚貽誤於前曾紀澤力爭於後茲訂新約應就原圖指辦酌  
定新界清安等當與俄官量議推展期後來彼此相安丁巳諭有司慎覈秋審  
甲子詔雲南布政使唐炯出關視邊防乙丑安置李是應於保定尋朝鮮國王  
乞釋歸不許丁丑彗星復見東南詔內外臣工修省九月乙酉河決山東惠民  
商河濱州癸巳鬱林匪亂官軍剿平之是秋賑四川浙江山東陝西福建江西  
貴州水災資州火災臺灣風災水災冬十月乙卯諭京師嚴緝捕毋諱飾擾累  
壬戌河決懸城甲子諭捕喇匪丁丑王文韶連疏乞罷溫旨慰留十一月丁亥  
王文韶仍以養親乞罷許之命翁同龢爲軍機大臣戊子命潘祖蔭爲軍機大  
臣台州匪首王金滿日久逋誅下所司嚴緝乙未允朝鮮互市辛丑開天津場  
河淀南新河壬寅以地震詔臣工勤職察吏庚戌詔中外保薦人才是月開銅

山縣煤鐵鑛十二月辛酉命游百川赴山東勘河工壬戌設滬粵沿海電綫乙丑詔中外清理積案壬申自上月連雨雪至是雪是冬賑直隸地震災四川陝西雹災免齊齊哈爾墨爾根歉地浙江州縣衛新舊屯地仁和等場寇蕩額賦是歲朝鮮入貢

九年癸未春正月癸未朔停筵燕內申劉錦棠言沙克都林札布與俄使勘分新疆南界不符舊約諭長順等按約詰之尋諭曾紀澤力爭重勘戊戌命宗人府丞吳廷芬在總理各國事務衙門行走庚子諭蠲免錢糧民已輸官者得抵翌年正賦勿重徵乙巳撥鄂漕三萬石備賑順直饑是月越南匪覃四娣等降二月甲寅直隸流民紛集京師諭有司撫卹戊午山東河決厯城齊河諸縣民捻壞命游百川等賑撫災民己未先是馬蘭鎮總兵景瑞修繕營房爲營兵匿控總兵桂昂請兵激變遣伯彥訥謨敬銘查辦至是覆陳褫景瑞職桂昂尋並褫職禁各省酷吏非刑命廣西布政使徐延旭出關籌防戊辰福建按察使張夢元督辦福建船政癸酉高州都司莫毓林聚亂伏誅庚辰刑部言河南

胡體安一獄原讞舛誤覆審回護詔褫巡撫李鶴年河東河道總督梅啓照職  
原審官譴戍有差戊辰鎮國公溥泰收受禁墾地坐創爵圈禁一年法人陷  
南甯乙未命唐炯統防軍守雲南邊境諭倪文蔚保北圻是春免潛山等縣夏  
糧陝西被旱丁糧米折賑濟南武定水災臺灣地震災夏四月己未俄撤伊犁  
駐兵甲子諭嚴緝畿輔盜賊甲戌劉長佑以病免授岑毓英雲貴總督乙亥賜  
陳冕等三百八人進士及第出身有差五月辛巳詔李鴻章回北洋署任部署  
海防壬午命升泰與俄使勘分塔爾巴哈臺西南界丁亥湖南會匪方雪教倡  
亂擒斬之辛卯禁私鑄錢庚子諭岑毓英等選募邊民與官軍扼守滇越要隘  
戊申懿旨醇親王會籌法越事宜先是御史陳啓泰奏太常寺卿周瑞清包攬  
雲南報銷御史洪良品給事中鄧承修以事涉樞臣景廉王文韶相繼論劾先  
後命惇親王閔敬銘潘祖蔭張之萬麟書翁同龢薛允升會同察辦至是覆陳  
瑞清等罪如律戶部尙書景廉前侍郎王文韶奎潤前尙書董恂與前雲貴總  
督劉長佑俱鑄三級餘處罰有差六月庚戌山東河決壞厯城齊東利津民埝

諭堵塞賑撫並行越將劉永福及法兵戰於河內敗之乙卯修沁河堤戊午法國遣使托古利來議和約太監王永和盜御用衣物詔刑部按律擬罪勿株連丁卯潞山東小清河庚午山東以水災開辦賑捐事例是夏免雲南土司地租甘肅舊欠糧賦又免懋功被災銅仁被水額糧留漕糧凡十萬石京餉十六萬兩賑山東災秋七月己卯留京餉二十萬給廣西軍壬午諭令吳全美方耀分巡廉瓊洋面及欽州邊境戊子詔開雲南鑛辛卯台州匪首王金滿率衆降詔免死與餘衆留營效力八月法人破順化河岸礮臺越人停戰議和壬子永定河決乙卯考察部院官諭修築沿海隄塘各工並撫卹災戶丙寅詔舉謀勇兼優堪備任使者己巳詔彭玉舉赴廣東會同張樹聲布置防務九月辛巳法越議和立新約丙戌命何如璋督辦福建船政倪文蔚爲廣東巡撫徐延旭爲廣西巡撫己亥撥廣西庫銀十萬濟劉永福軍丁未唐炯以率行回省褫職仍留任是秋撥京倉及漕米五萬餘石庫帑凡十萬賑順天直隸留漕五萬石賑山東賑熱河長陽嶧縣等處水災賑江南災冬十月戊辰詔南北洋及沿江沿海

諸省嚴戒備辛未河決齊東蒲臺利津丙子詔李鴻章舉將才命岑毓英出關駐山西唐炯回滇籌餉十一月辛巳命署左副都御史張佩綸在總理各國事務衙門行走壬午趣徐延旭出關策應辛卯嚴內外城門禁壬辰越南民變殺嗣王阮福時命張樹聲截定之尋改命岑毓英往平亂庚子懿旨清江設廠收養災民命戶部發帑一萬接濟並給順直山東各四萬湖北三萬安徽二萬壬寅法人陷山西劉永福退走癸卯詔以尙書文煜被劾回奏積俸至三十六萬命捐銀十萬充公林肇元坐庫儲空虛奪職十二月戊申祈雪庚戌法人進攻北甯圍犯瓊州命彭玉璣檄湘楚軍會合吳全美師船嚴防起楊岳斌往福建會辦海防官軍大敗法人於諒山己未以山東淮徐災民聚集清江等處命所司撫恤並隨時資遣庚申諭江西籌餉二萬濟王德榜軍丁丑追復故總兵陳國瑞世職是冬免順天直隸等州縣秋賦浙江被災州縣衛所額賦除山西鳳台等州縣荒地租糧是歲朝鮮越南入貢

十年甲申春正月庚寅岑毓英出鎮南關赴興化節制邊外諸軍二月丁未朔

法人攻興化官軍擊卻之岑毓英與徐延旭進圖山西諭嚴約束勿擾越境留江浙漕米各五萬石賑通州天津水災尋撥京倉粟米三萬石賑順天災丁丑法人陷北甯官軍退守太原戊辰命湖南巡撫潘鼎新赴廣西籌防乙亥法人陷太原徐延旭唐炯褫職逮問三月丁亥岑毓英請免節制楚粵諸軍不許以太原陷提督黃桂蘭道員趙沃並褫職逮問戊子懿旨以因循貽誤罷軍機大臣恭親王奕訢家居養疾大學士寶鋆原品休致協辦大學士李鴻藻景廉俱降二級工部尙書翁同龢褫職仍留任命禮親王世鐸戶部尙書額勒和布閣敬銘刑部尙書張之萬並爲軍機大臣工部侍郎孫毓汶在軍機學習己丑懿旨軍機處遇重要事會同醇親王商權行之壬辰授潘鼎新廣西巡撫張凱嵩雲南巡撫總兵陳得貴失守礮臺副將黨敏宣臨陣退縮詔並斬於軍前以怡親王載敦爲閱兵大臣命貝勒奕劻管總理各國事務衙門事內閣學士周德潤在總理各國事務衙門行走癸巳左庶子盛昱右庶子錫鈞御史趙爾巽各疏陳醇親王不宜與聞機務不報命刑部侍郎許庚身在軍機學習甲午詔李

鴻章左宗棠曾國荃岑毓英舉部將中沈毅勇敢有謀略者己亥閏敬銘許庚身並在總理各國事務衙門行走命潘鼎新赴鎮南關接統徐延旭軍庚子法人進據興化是春免仁和荒蕪竄蕩上年通課陝西咸甯等處通賦及雜欠免穆坪土司馬匹糧草十年夏四月丙午勘分新疆南界事竣以侍講許景澄充出使法德義和奧大臣庚戌先是法越戰事亟法水師將福祿諾屬稅務司德璫琳獻議媾和息兵李鴻章以聞許之敕其籌定至是覆陳當審勢量力持重待時詔集廷議懿旨醇親王並與議允吳長慶兵還辛亥利津等決口合龍癸丑罷開馬頰河濬宣惠河修德州運河隄戊午命通政使吳大澂會辦北洋事宜內閣學士陳寶琛會辦南洋事宜侍講學士張佩綸會辦福建海疆事宜皆許專奏尋加佩綸三品卿銜福祿諾出私議五條因李鴻章上聞敕鴻章力杜狡謀常存戒懼詔戶部裁冗費庚申授李鴻章全權大臣與法使議約癸亥免襄城瀕江地畝額賦乙丑祈雨丙寅再發倉米賑順天戊辰吳大澂辭北洋會辦上責其飾詞不許壬申張樹聲以疾請免本職專治軍事許之五月丙子命

李成謀總統江南兵輪已卯岑毓英辭節制粵楚各軍許之丁亥授文煜武英殿大學士戊子額勒和布閤敬銘並以戶部尙書協辦大學士己丑京師久旱諭有司平糶實徵甯太廣道張蔭桓三品卿在總理各國事務衙門學習行走辛卯詔中外保薦文武人才甲午詔皇太后五旬萬壽停秋決丁酉詔中外大臣率屬盡職勿耽逸樂尙浮華戊戌詔左宗棠仍爲軍機大臣毋庸常川入直並管理神機營免武昌黃州二衛額糧壬寅詔舉宗室及旗漢世職人才閏五月乙巳命工部尙書福錕理藩院尙書崑岡左都御史錫珍工部侍郎徐用儀內閣學士廖壽恒並在總理各國事務衙門行走丁未命前提督劉銘傳督辦臺灣事務錫珍廖壽恒陳寶琛吳大澂往天津會商法約戊戌命太常卿徐樹銘勘獻縣新開橫河法人犯觀音橋潘鼎新擊敗之辛亥山東河隄工成甲寅以法使言和調潘鼎新諸軍回諒山岑毓英軍仍駐保勝乙卯自四月不雨至於是日始雨頒定獨緩錢糧章程庚申恩恩匪首莫夢弼伏誅丙寅法艦犯閩海丁卯諭曰法使延不議約孤拔要求無理我軍當嚴陣以待彼如犯我併力



擊之敢退縮者立置軍法庚午授曾國荃爲全權大臣與法使於上海議約命陳寶琛會辦六月癸酉朔以郅西余瓊芳獄事謝不實下總督下寶第巡撫彭祖賢部議承審各官貶斥有差甲戌河決歷城等縣以乞援守城追予沈葆楨妻林氏附祀廣信葆楨專祠丙子建昌多倫匪首楊長春伏誅丁丑吳長慶卒旌其子主事保初孝行己卯諭直省考察州縣官壬辰法人陷基隆詔集廷臣議和戰乙未劉銘傳復基隆己亥懿旨神機營選馬步軍三千巡捕五營選練軍二千以都統善慶爲總統前鋒統領托倫布爲幫統分防畿東並抽調直隸練軍協守命曾國荃陳寶琛回江甯布防是月賑順德青浦風災葉縣水災秋七月乙巳命吳元炳勘山東河上海防授張之洞兩廣總督丙午法人襲馬尾礮臺及船廠陸軍擊退之戊申醇親王奏延煦劾左宗棠斥爲蔑禮不臣肆口妄陳任情顛倒懿旨坐延煦奪職留任罰俸一年戊申詔與法人宣戰楊昌濬赴福建督師癸丑法人毀長門礮臺丁巳諭穆圖善張佩綸毋退駐省城詔授左宗棠爲欽差大臣督辦福建軍務福州將軍穆圖善漕運總督楊昌濬副之

張佩綸以會辦大臣兼署船政大臣授曾國荃兩江總督兼南洋大臣丙寅論北甯失守罪已革道員趙沃提督陳朝綱並論斬戊辰以楊昌濬爲閩浙總督普賑歷城等縣災民是月賑浮梁及齊河長安等處水災八月壬申命鴻臚寺卿鄧承修在總理各國事務衙門行走論馬尾戰事功罪褫何璟職及張佩綸卿銜下部議提督黃超羣等頒賞進秩有差建邵匪首張廷源等伏誅甲戌河決東明賑南海等縣水災丙子授李鴻章直隸總督北洋大臣戊寅懿旨賞醇親王子載灃不入八分輔國公文煜以病免命崇厚崇禮文錫文銑輸財助餉庚辰賑台灣風災丁亥法人復陷基隆戊子命道員徐承祖充出使日本大臣己丑詔刑部本年情重各案及秋朝審官犯並停查辦癸巳蘇元春及法人戰於陸岸敗之命楊岳斌幫辦左宗棠軍務賑星子水災戊戌法人犯滬尾提督係開華擊敗之九月癸卯逮唐炯下獄廷訊乙巳出帑金五萬賚劉永福軍辛亥嚴諭南北洋輪船悉援臺灣壬子劉銘傳爲福建巡撫駐臺灣督防蘇元春幫辦潘鼎新軍務楊昌濬等分防澎湖張兆棟何如璋並褫職詔免雲南田稅

暫荒緩三年永荒蠲十年甲寅劉銘傳自請治罪詔原之戊午留新漕十萬備山東冬賑庚申以滬尾戰勝予總兵孫開華世職發帑銀一萬犒軍授額勒和布體仁閣大學士乙丑以刑部尚書恩承協辦大學士丙寅賑鳳凰城潦災庚午官軍及法人戰於陸岸又敗之予蘇元春世職辛未新疆改建行省置巡撫布政使各一裁南北路都統參贊辦事領隊諸職冬十月壬申朔懿旨晉封奕劻慶郡王奕謨固山貝子癸酉以劉錦棠爲甘肅新疆巡撫戊寅賑江北廳等處水災雹災辛巳皇太后五旬聖壽上率王以下文武大臣等詣慈寧宮慶賀辛卯鮑超屢誤師期切責之癸巳以託疾規避奪提督王洪順職甲午張樹聲卒乙未朝鮮復亂吳大澂往察辦續昌副之文煜卒庚子劉永福及法人戰於宣光收績十一月丁未命提督孫開華幫辦臺灣軍務戊申逮徐延旭下獄廷訊壬子李鴻章調軍發朝鮮癸丑普洱地震丙辰禁州縣捏報災荒丁巳東明決口合龍戊午李秉衡赴龍州部署防運己未祈雪雲南巴蠻降戊辰諭各省積穀十二月戊寅官軍敗法人於紙作社壬午唐炯徐延旭並論斬乙酉官軍

復宣光興化山西三省安平府暨二州五縣壬辰祿勸夷匪平丙申雨雪張佩綸何如璋並視職遣戍是歲免鎮西廳荒地通賦文安四州縣澇地額賦朝鮮入貢越南國王阮膺登自殺法人立其弟爲國王

十一年乙酉春正月癸卯命馮子材襄辦廣西關外軍務乙巳法人陷諒山丙午官軍圍宣光復美良城甲寅法人犯鎮南關總兵楊玉科死之乙卯賜英將戈登卹金甲子法艦去台灣左宗棠等兵援浙江乙丑命李鴻章爲全權大臣偕吳大澂與日使議朝鮮事庚午朝鮮亂平使來表謝資之二月甲戌浙江提督歐陽利見敗法人於鎮海口戊寅視潘鼎新職以李秉衡署廣西巡撫蘇元春督辦廣西軍務辛巳秦州地震癸未馮子材王孝祺大敗法人於鎮南關外遂復諒山予楊玉科等世職辛卯法人請和允之壬辰詔停戰撤兵緬匪平戊戌岑毓英奏官軍大捷於臨洮乙巳命李鴻章爲全權大臣與法使議約刑部尙書錫珍鴻臚卿鄧承脩往津會商丙午朝鮮訂約成庚戌岑毓英復緬匪與清水清山諸寨獲越南叛臣黃協等誅之癸丑命吳大澂依克唐阿會勘吉林

東界內辰免永平張家口順天等十府州積年民欠租賦癸亥命馮子材督辦  
欽廉防務乙丑免陝西咸甯等處前歲逋糧夏四月己卯祈雨內戊趣岑毓英  
撤軍毋爽約開衅辛卯諭除江西丁漕積弊壬辰趣劉永福撤回保勝軍天津  
會訂中法新約成五月丁未懿旨勘修南北海工程詔整海軍大治水師下南  
北洋大臣等籌議基隆法兵退命楊岳斌等部署全臺事宜除福建光緒初年  
逋賦辛亥許乍丫隨察木多入貢癸丑予蘇元春馮子材三等輕車都尉王孝  
祺岑毓英雲騎尉復王德榜原官優叙辛酉復祈雨壬戌雨丁卯以張曜爲廣  
西巡撫是月賑基隆兵災桐城等縣及鎮草水災六月己巳詔停秋決庚午懿  
旨命文銛崇禮崇厚文錫修建三海工程許景澄兼出使比利時大臣辛未定  
內附越南民籍甲戌曾紀澤訂煙台約成丁丑諭岑毓英察雲南銅鐵通諭曾  
國荃等勘東南各鑛賑裕州水災癸未命工部侍郎孫毓汶順天府尹沈秉成  
湖南按察使續昌均在總理各國事務衙門行走召曾紀澤來京命江西布政  
使劉瑞芬充出使英俄大臣張蔭桓充出使美日秘大臣法兵去澎湖命左宗

棠等選將吏調輪船策應辛卯越南新約成宣諭中外詔誠建言諸臣挾私攻訐追論御史吳煦劾閣敬銘編修梁鼎芬劾李鴻章俱誣謗大臣予嚴議尋各降五級甲午授孫毓汶軍機大臣是月賑河南廣東廣西江南安徽江西水災秋七月丁酉朔設廣西南甯電線達雲南己亥懿旨發帑銀六萬賑兩廣水災庚子左宗棠連乞病許之內辰命周德潤往雲南鄧承修往廣西會同岑毓英張凱嵩勘中越界壬戌河決山東長清甲子開川滇銅鐵鑛是月賑黔陽湘潭輝縣清江當塗汾陽等處水災八月丁卯朔賑奉天水災己巳截漕糧十萬石充順直賑需賑皋蘭等處雹災水災乙亥賑長沙等處水災丁丑山東歷城章邱等處水發帑五萬賑之以水災故停三海工作李鴻章與法使議滇粵陸路通商戊寅釋李是應歸朝鮮辛巳命蘇元春存撫越南入關流民賑襄城水災乙酉左宗棠卒管太傅辛卯賑福建風災九月庚子懿旨醇親王總理海軍事務奕劻李鴻章會辦漢軍都統善慶兵部侍郎曾紀澤幫辦改福建巡撫爲臺灣巡撫歸福建巡撫事於閩浙總督英使來議印度西藏通商諭丁寶楨色楞

額等開導藏番毋生事壬寅靈桂卒甲辰裁伊犁參贊大臣改設副都統二裁  
塔爾巴哈台滿洲領隊大臣仍留額魯特領隊大臣甲寅賑賓州思安等處雹  
災冬十月丙寅朔朝鮮王李熙以伏莽未除來請鎮撫李鴻章遣軍防衛之戊  
辰賑朝陽災庚辰裁來年京餉銀五萬充山東冬賑辛巳命奕劻許庚身與法  
使互換條約劉瑞芬於英京互換烟台條約並議洋藥專條丁亥授穆圖善爲  
欽差大臣會同東三省將軍辦理練兵節制副都統以下甲午撥年節宮用銀  
五萬賑給山東災區嚴禁城門禁十一月壬寅祈雪乙巳雲南地震庚申裁  
新疆各城回官癸亥懿旨八旗都統釐剔旗營諸弊授恩承體仁閣大學士閻  
敬銘東閣大學士戶部尙書福錕刑部尙書張之萬並協辦大學士以英人滅  
緬甸嚴四川邊備十二月丙寅續設三姓黑龍江陸路電線丙子詔內務府禁  
止浮冒虛糜己卯趙莊決口合龍是冬賑潮州萬縣水災臺灣風災免永甯被  
水丁銀浙江各州縣衛荒廢並新種地課減文安天津窪地糧賦除徐溝汾陽  
被水銀稅

十二年丙戌春正月乙未朔停筵宴庚子免湖北通賦辛丑山東潞溝決口合龍免臺灣舊欠供粟癸卯免奇台被旱額賦丙辰命特爾慶額等隨同穆圖善練兵甲子詔以謁陵本年會試改三月十日入場二月乙丑朔山東黃河南岸決甲戌張曜往勘何王莊決口己卯除溲浦積年被水額賦戊子設黑龍江綏化廳辛卯上奉皇太后謁東陵免經過州縣稅糧十分之四三月乙未謁諸陵上詣定東陵庚子至自東陵癸丑賑廣甯災是月留山東新漕十萬石賑何王莊賢章邱濟陽惠民被水災民夏四月乙丑戊子賜趙以炯等三百三十九人進士及第出身有差是月邱北地震及廣西州火賑之五月庚子臺灣生番歸化四百餘社七萬餘人賑臨潼等縣風雹災壬寅裁陽江鎮水師總兵置北海鎮水陸總兵改高州鎮陸路總兵爲水陸總兵六月壬申懿旨欽天監於明年正月擇皇帝親政日期甲戌修復海鹽石塘丙子醇親王暨王大臣等合祠疏請皇太后仍訓政不許皇帝親政定於明年正月十五日舉行命樞臣集議整齊園法庚辰醇親王暨禮親王等復申訓政之請尙書錫珍御史貴賢並以爲



言懿旨勉從之命醇親王仍措置諸務七月甲午木邦土司請內附邵之丁酉金順卒辛丑留江蘇漕米五萬石備順保賑需乙巳錢法議定奏上允行甲寅賑太原等縣水災八月壬戌以色楞額爲伊犁將軍賑熱河水災乙丑禮親王暨廷臣請加上皇太后徽號懿旨不許丁卯再撥江北漕米五萬石賑順天通州水災並發帑金二萬散給災民免陝西咸甯等處荒田通賦戊辰以北運河決口漫溢撥庫帑十萬充永平各府急賑再發內帑二萬濟之丙子增設廣西太平歸順道移提督駐龍川增設柳慶鎮總兵駐柳州庚辰築懷柔白河漫口乙酉御史朱一新奏遇災修省豫防宜寺流弊言醇親王巡閱北洋總管太監李蓮英隨往恐蹈唐代監軍覆轍懿旨命回奏尋奏入以執謬降主事九月辛卯朔賑奉天浙江水災癸巳賑甘肅雹災水災留壩南鄭水災丁酉以順直水災減各府各旗莊田租及其他租額庚子鮑超卒乙巳賑光山雹災丙午劉銘傳剿蘇魯馬那邦叛番甲寅賑上饒等縣水災十一月庚寅朔壽張決口合龍乙巳宥徐延旭唐炯罪延旭戍新疆炯戍雲南丁未命曾紀澤在總理各國事

務衙門行走庚戌再撥京倉粟米三萬石備順天春賑丙辰冬至祀天於圜丘始親詣除降科多城額賦十一月甲子減安州河間隆平潞地糧賦丁卯祈雪庚辰懿旨再敕曾國荃等詳議兩江河道治法丁亥祀祭太廟是歲朝鮮入貢

十三年丁亥春正月己丑朔停筵宴辛丑以親政遣官告天地宗廟社稷祈穀於上帝癸卯上始親政頒詔天下覃恩有差壬子撥江蘇漕米十萬石賑順直災民懿旨購置機器於天津鼓鑄一文以一錢爲率京外毋得參差二月壬戌雨雪辛酉責恭鏜嚴剿馬賊整頓見有練軍川滇接修電線成戊辰祭大社大稷辛巳賞唐炯巡撫銜督辦雲南礦務是月懿旨醕親王以親王世襲罔替朝廷大政事仍備顧問三月己丑朔上初詣奉先殿行禮乙未上奉皇太后謁西陵免經過州縣額賦十分之三己亥謁陵甲辰至自西陵辛巳祀先農親耕藉田三推畢加一推自是歲以爲常甲寅劉錦棠請解職省親就醫不許給假三月在任調理撥直藩庫帑八萬賑所屬饑民除文安等處無糧地租夏四月戊

午朔享太廟丁卯命內閣侍讀學士林維源督辦臺灣鐵路及商務己巳祈雨  
丙子常雩祀天於圓丘閏四月己酉免江蘇各州縣衛通賦逋課壬子賑昆明  
等縣水災五月戊午夏至祭地於方澤己未命前內閣學士洪鈞充出使俄德  
奧和大理卿劉瑞芬充出使英法義比大臣癸未賑隴州等處水災甲申  
兩六月丁亥朔賑富陽各屬水災乙巳賑懷寧等縣水災丁未開州大辛莊河  
溢灌山東境截留新漕五萬石賑濮州等處災民庚戌賑羅田石首水災壬子  
賑溫宿烏什水災癸丑賑凌雲風雹災秋七月丙辰朔日有食之庚申永定河  
潮白河先後並溢甲子增設福建澎湖鎮總兵乙丑賑南陽等處水災丁卯除  
甘肅節年民欠銀糧暨雜賦賑洮州等屬雹災乙亥增設雲南臨安開廣道丁  
丑黎匪平辛巳命道員黎庶昌充出使日本大臣八月戊子祭大社大稷甲辰  
沁河決賑平彝水災丙午沔陽等州縣被水留冬漕三萬石賑之鄭州河決南  
入於淮賑河督成孚職留任己酉撥京倉漕米五萬石賑順天通州各屬截留  
京餉漕折銀三十萬賑河南癸丑懿旨發內帑銀十萬賑濟水災九月乙卯朔

免陝西各府廳州縣前歲逋賦辛酉以鄭州河決豫留明年江北江蘇河運米糧並運費充賑辛未准略徵胡圖克圖入貢乙亥命薛允升赴河南察鄭工丁丑李鴻藻往河南會察河工是月賑武陟安縣雲陽皖北水災漢口龍州火災建水通海雹災冬十月甲申朔賑融縣火災丁亥馮子材以疾辭職命留粵辦欽廉防務乞休不許己丑賑惠高廉雷瓊赤溪陽江風災己亥穆圖善卒賑給鄭州等災區貧民口糧壬寅以善慶爲福州將軍襄辦海軍事並管神機營免順直被水各州縣秋賦乙巳賑鎮西廳雪災戊申上侍皇太后臨視醇親王疾自是頻視疾至於明年七月有瘳庚戌賑長安等屬水災癸丑賑綏來霜災十一月乙卯授定安欽差大臣會同東三省將軍辦理練兵節制副都統以下辛酉冬至祀天於圓丘壬戌諭文碩訪呼畢勒罕依制掣定壬申祈雪十二月丁亥命李鴻藻督辦鄭州河工己丑除恩隆百色等處荒田額賦賑桂林等處火災壬辰免陽城等縣災緩稅租丁酉雨雪戊戌懿旨復閭敬銘福錕翁同龢嵩申孫詒經景善孫家鼎處分庚子以皖北被災撥安徽漕折蕪湖關常稅共銀

十萬備來年春賑辛丑置新疆伊塔道伊犁府霍爾果斯廳塔城廳設道府撫民通判同知等官壬寅石屏建水地震己酉撥山東冬漕五萬石備河南來年冬賑是歲朝鮮入貢

十四年戊子春正月癸丑朔上親詣堂子行禮丙辰雪免安徽被淹太和等州縣夏糧已未開黑龍江漠河金鑛庚申開廣東昌化石綠銅鑛辛酉展接騰越至雲南省垣電綫乙亥劉錦棠乞疾慰留再給假四月壬午諭官鑄當十大錢每文重至二錢以上者一律行用是月撥留京倉及海運漕米凡十三萬石賑順直災二月乙酉賑梧州火災丙戌賞裴蔭森三品京堂督辦福建船政庚寅文碩以擅行密疏稿於都察院褫職辛亥祀先農親耕藉田是月詔修葺頤和園備皇太后臨幸三月丙辰免浙江光緒五年以前通賦丙寅賞班禪額爾德尼轉世呼畢勒罕哈達念珠如意夏四月庚寅永定河決口合龍辛卯上奉皇太后始幸西苑甲午展接廣東電綫自九江至大庾嶺丁酉雨雹辛亥命張曜幫辦海軍事務賑惠州等屬水災五月乙卯京師奉天山東地震癸亥夏至祀

地於方澤丁卯祈雨六月癸巳雨己亥懿旨皇帝大婚典禮明年正月舉行甲辰彭玉鑾以疾免兵部尙書巡閱長江水師如故壬寅懿旨明年二月初三日歸政七月庚申以河工貽誤褫李鴻藻倪文蔚職仍留任李鶴年成孚並成軍臺甲子永定河復決丙寅閣敬銘罷丁丑諭吳大澂察覈河工是月津沽鐵路成八月丁亥賑奉天各廳州縣安徽懷甯等縣水災己丑詔直省清庶獄壬辰賑蒼梧等處水災丁酉截留江北漕米備蘇皖賑乙巳醇親王以歸政有日請解職務懿旨海軍署神機營依前管理歸政後奏事勿列銜九月丙辰除陝西去年通賦甲戌永定河決口合龍冬十月己卯朔享太廟癸未懿旨立葉赫那拉氏爲皇后癸巳撥京漕二萬石備順天冬賑甲午免水城等處丁糧賑丹徒旱災南昌等縣水災庚子免朝鮮紅襪釐稅十一月壬戌滇越邊界聯接中法電綫成初置北洋海軍提督以丁汝昌任之內寅冬至祀天於圓丘丁卯免朝賀戊辰免靜海積水淀地租十二月壬午賑阿迷蒙自等處疫災乙酉詔光緒十五年舉行恩科鄉試十六年恩科會試辛卯增設吉林水師營總管各官癸

已太和門災甲午詔修省敕臣工勤職乙未免陝西前歲民欠錢糧丁酉懿旨以火災停減頤和園工作御史余聯沅屠仁守洪良品各疏請罷鐵路徐會澧等條奏同下海軍署與軍機大臣議旋翁同龢奎潤游百川文治等並言鐵路不當修亦並下議命太僕少卿林維垣襄辦臺灣開墾撫番事庚子賑威遠廳水災辛丑道員徐承祖前使日本坐浮胃礙職聽勘籍其家丙午鄭州決口合龍授吳大澂河東河道總督復李鴻藻倪文蔚原官並優叙釋成孚李鶴年還十五年己丑春正月丁未朔停筵宴庚申靖遠皋蘭地震辛酉以張之萬爲東閣大學士徐桐以吏部尙書協辦大學士海軍署會同軍機議駁停鐵路諸疏覆請詳議懿旨慶裕定安曾國荃張之洞黃彭年等按切時勢各抒所見以聞乙丑惇親王薨上奉皇太后臨奠丁卯御史屠仁守上言歸政伊邇時事孔殷密摺封奏請仍書皇太后聖鑒披覽後施行懿旨斥其乖謬罷御史下部議原摺擲還戊辰御史林紹年請禁督撫報效懿旨斥之癸酉大婚禮成二月戊寅吳大澂請敕議尊崇醇親王典禮懿旨斥之通諭中外臣民己卯皇太后歸政

上御太和殿受賀頒詔天下丙戌免江淮光緒初年災熟各項稅糧己丑以齊東等州縣水災撥山東庫帑五萬備賑壬辰加上皇太后徽號頒詔覃恩有差甲午朝鮮慶賀歸政進方物賀其國王及王妃綬匹三月丙午朔命侍講崔國因充出使美日秘大臣丁未彭玉麟辭巡閱職溫諭慰留濮州河決癸丑以布魯克巴部長歸化予封號印敕甲寅撥黑龍江庫帑二萬加賑呼蘭屬災民丁巳皇后祀先蠶己未再加上皇太后徽號庚午免雲南被匪村寨錢糧戊辰上奉皇太后幸頤和園閱水陸操允閣敬銘回籍養病夏四月戊寅撥南漕十萬石備山東賑己卯賑奉天吉林災民辛卯賞湖南按察使薛福辰三品京堂充出使英法義比大臣懿旨發內帑銀十萬備山東賑庚子賜張建勳等三百三十一人進士及第出身有差五月癸丑停秋決庚申賑瀘州火災六月丙子岑毓英卒丁丑以王文韶爲雲貴總督己卯重修太和門丁亥賑周家口火災壬辰永定河道缺李鴻章舉堪任之員上疑於魁柄下移予申斥秋七月丁未章邱河決己酉除貴州西良山額課庚午齊河決辛未沁河決是月賑莒州沂水



雹災周家口水災長安西鄉鄠州水災雹災賑雲南昆陽太和安徽霍邱等州  
縣水災八月乙亥命李鴻章張之洞會同海軍署籌辦蘆漢鐵路丁亥留新槽  
十萬石備山東賑壬辰以四川水災捐款五萬賑災民丁酉天壇祈年殿災庚  
子賑伊犁綏定等處地震災辛丑免貴州被賊府廳州縣衛未徵並民欠稅糧  
九月壬子重修祈年殿賑溫州等處風災水災癸丑免陝西各屬前歲通賦賑  
咸甯等處水災雹災乙卯賑皋蘭等處水災壬辰長垣隄決黃水浸入滑縣丙  
寅諭定安等除東三省練兵弊習丁卯定明年祈穀暫於園丘舉行冬十月乙  
亥賑曲陽等處雹災水災戊寅設西安至嘉峪關電線賑杭嘉湖屬水災丁亥  
以江浙雨水爲災各撥庫儲五萬並發內帑五萬賑濟以張之洞訂購機器遽  
立契約詔切責之嗣後凡創設之事未先奏明毋輕舉己丑撥武昌庫儲十萬  
備湖北賑需壬辰詔各省兩司仍專摺奏事臺灣社番亂副將劉朝帶等陣沒  
敕劉銘傳剿辦之甲午再撥浙江庫儲十五萬賑杭嘉湖災己亥山東大寨河  
工合龍壬寅撥蘇皖賑捐餘款修運河賑綏德等屬雹災水災十一月丙辰允

海軍署請戶部歲撥二百萬開辦鐵路丁巳詔汰冗員刪浮費戊午撥安徽漕折銀三萬備安慶甯國泗州賑需丙寅浙江發常平倉穀賑天台仙居等處難民十二月壬申朔免杭嘉湖應徵漕白糧并地丁稅甲戌留山東漕米四萬石備賑丁丑再撥武昌庫儲五萬備湖北賑需丁亥山東西紙坊漫口合龍癸巳申禁辦理蠲緩積弊免雲南匪擾村寨錢糧丁酉免鄭州睢甯尉氏等州縣稅糧免仁和等縣杭嚴衛所糧課是歲朝鮮入貢

十六年庚寅春正月壬寅朔停筵宴辛酉免直隸十三年以前竈課丁卯諭本年萬壽毋庸告祭停升殿禮免各省文武大員來京祝嘏二月乙酉張曜言統核山東河工需費二百八十八萬有奇命所司籌給壬辰臺灣內山番社曾有敏等伏誅是月免榆林等州縣十三年逋賦除東川被水官田稅糧免文安靜海霸州淀泊通租及伯都訥地課閏二月壬寅賑桂林各屬火災己酉命太僕寺卿張蔭桓在總理各國事務衙門行走乙卯上奉皇太后謁東陵免所過地額賦十分之三庚申上臨奠端慧皇太子園寢癸亥至自東陵乙丑曾紀澤卒

尋予特諭李鴻章整頓北洋水陸軍定安等訓練東三省兵三月辛未懿旨  
劉銘傳幫辦海軍事務西甯地震賑卹之辛卯以二旬萬壽頒詔天下覃恩有  
差乙未濬餘杭南湖瞻對番目撒拉雍珠與巴宗刺麻結野番作亂官軍剿平  
之夏四月庚寅彭玉麟卒庚戌諭整頓土藥稅釐命剛毅詳察徐州土藥出產  
及徵稅實額嚴定整理章程丁卯賜吳魯等三百三十六人進士及第出身有  
差五月己巳朔日有食之辛未色楞額卒以長庚爲伊犁將軍丙子以升泰爲  
駐藏大臣己卯上詣大高殿祈雨乙酉御畫舫齋閱侍衛步射至壬辰皆如之  
己丑雨築閘鄉沿河石壩賑卹等縣風災六月己亥朔徙齊東各州縣瀕河  
村民二千餘戶丁未開三姓金鑛戊申以藏事平頒給布魯克巴部長敕印自  
癸卯至己酉連祈晴辛亥近畿霖雨成災京師六門外增設粥廠命撥京倉米  
萬五千石煮賑並發內帑五萬充賑需壬子永定河決口癸丑永北屬土司章  
天錫謀逆官軍討斬之丁巳撥奉天連京粟米並留江北漕米備天津災賑甲  
子萬壽節御乾清宮受賀秋七月乙亥鎮康土族亂剿平之詔責李鴻章堵合

永定河決口己卯發帑五萬兩大錢五十萬貫米十萬石賑順天各屬災壬午諭嚴懲領放賑款侵冒剋扣庚寅分撥部庫及海關銀凡三十萬濟永定河工癸巳命翰林院侍讀許景澄充出使俄德和奧大臣道員李經方充出使日本大臣賑湖北廣西陝西雲南水災八月壬寅再撥京倉米十萬石備順天賑需乙巳上詣醇親王邸視疾己酉劉錦棠乞歸仍予假壬子以劉銘傳擅興商鐵章程紕繆諭止之予部議丁巳留漕米五萬石撥庫帑十萬備山東賑壬戌以順直水患諭王公各府京旗莊田並減租是月免陝西江西通賦賑陝西水災雹災雲南水災臺灣風災九月乙亥戶部言祿米倉虧十五萬石倉場侍郎興廉游百川下部議尋並奪職丙子賑琿春寧古塔潦災壬午御史吳兆泰請停頤和園工程予嚴議永定河決口合龍甲申賑甘肅雹災壬辰石埭會匪亂剿定之癸巳撥部帑及倉米於順天備賑冬十月丁未以劉坤一爲兩江總督兼南洋大臣庚戌曾國荃卒贈太傅辛亥再撥京倉米五萬石備順天賑免奉直魯豫商販雜糧稅捐十一月乙亥賑湖南被水州縣災乙酉上奉皇太后臨醇

親王邸視疾丁亥醇親王薨輟朝七日上奉皇太后臨邸視殮皇太后賜奠命  
王子鎮國公載灃即日襲王爵上成服懿旨定稱號曰皇帝本生考己丑懿旨  
賜諡曰賢皇帝持服一年十二月壬子懿旨晉封輔國公載洵入八分鎮國公  
鎮國將軍載濤不入八分輔國公乙卯醇賢親王金棺奉移園寓上送至適園  
壬戌緩南苑工程甲子免浙江各廳州縣塲光緒初年逋賦

十七年辛卯春正月癸巳四川雷波夷匪就撫二月癸卯留海運漕米十六萬  
石備順直春撫己巳御史高燮曾請舉行日講詔以有名無實不納辛亥命李  
鴻章張曜會閱北洋海軍劉錦棠以憂去以陶模爲新疆巡撫雲南匪亂陷富  
民祿勸縣城討平之是月免湖北山西十三年以前逋賦三月丁卯諭資遣難  
民歸籍己巳皇后祀先蠶壬申修寶坻通薊諸州縣河工丁丑命李鴻章督修  
關東鐵路庚寅命沙克都林札布會額爾慶額勘察哈巴河辛卯劉銘傳以疾  
免夏四月丁酉立醇賢親王廟丙午復建祠辛酉頤和園藏工上奉皇太后臨  
幸自此始五月丁卯至庚午連雨辛未皇后躬桑壬午賑清江等處風災是月

京畿蝗總署以各省教案迭出請飭辦諭曰各國傳教載在條約商民教士各省當力衛其身家乃者焚毀教堂同時並起顯有匪徒布謠生事各督撫其緝治之俾勿有所擾害六月戊戌諭嚴緝會匪戊申詔會匪自首與密報匪首因而緝獲者原免之辛亥王文韶奏誅附亂參將鮑虎巧家廳披沙蠻曾祿汶茫伏誅滇支夷二十一寨就撫秋七月癸未以王文韶言雲南猛參猛角猛董土司劃界息爭予孟定土知府罕忠邦宣撫使銜土目罕榮高管理猛角猛董子土千總准世襲乙酉張曜卒八月壬辰朔予樂亭耆儒史夢蘭四品卿銜癸巳命奕劻總理海軍事務定安劉坤一襄辦己亥世祖御製勸善要言譯漢書成頒行直省學官朔望與聖諭廣訓一體宣講寶鋈卒癸丑諭疆吏飭營伍除積習嚴禁勾結包庇九月癸未免陝西前歲通課丙戌初與國來使自同治十二年以來皆見於紫光閣是月德使巴蘭德謂視如藩屬屢以易地爲言至是奧使畢格哩本來遂於承光殿覲見戊子雲南北勝土州同改土歸流免隰榆次等處通賦及旗租癸丑詔班禪額爾德尼呼畢勒罕明年正月坐牀升泰蘇呼

諾門罕往視頒寄敕書珍物甲寅予宋儒游酢從祀文廟戊午熱河朝陽匪亂提督葉志超聶士成剿平之十一月丁卯以熱河匪首擒戮諭民間無論入會否並許自新其自拔來歸者宥之乙亥命戶部侍郎崇禮兵部侍郎洪鈞並在總理各國事務衙門行走己卯海運倉火甲申以喀拉沁旗匪亂撥庫帑三萬賑撫之賑漢口火災十二月丙申免河南光緒初年通賦乙巳賑熱河被匪災區戊申申諭內務府樽節用費是冬免浙江陝西本年民欠稅糧

十八年壬辰春正月丁亥濬運河辛卯撥庫帑五萬於熱河賑教罕奈曼兩旗蒙古癸丑英兵入坎巨提回部頭目逃避色勒庫爾賑撫之三月庚申閏敬銘卒夏四月己酉葬醇賢親王是月臺灣內番山社作亂剿平之五月甲子陽江匪亂首逆譚連青伏誅庚午祈雨辛未賜劉福姚等三百一十七人進士及第出身有差乙亥合肥等州縣旱蝗賑之是月上林寶州匪首莫自閑等伏誅六月庚寅祈雨丙申雨壬寅命編修汪鳳藻充出使日本大臣閏六月己未永定河決庚申賑汾州及歸綏七廳旱災甲子留江蘇江北河漕各五萬石於順直

備賑丙寅阿克達春以奏對失辭罷山西巡撫丁丑以近畿水災撥部帑十萬  
備賑庚辰恩承卒是月京畿蝗秋七月辛丑發庫帑十萬備雲南各屬賑壬寅  
河南蝗癸丑諭唐炯整頓銅運八月丙寅命奎煥與英使保爾議印藏商約甲  
寅命福銀爲體仁閣大學士麟書協辦大學士留山東新漕備賑九月庚寅撥  
江北漕米五萬石備鎮江各屬賑己亥福建德化匪首陳拱伏誅壬寅免陝西  
前歲民欠錢糧十月乙卯朔留江南漕米三萬石備江寧諸縣賑庚申醴陵匪  
首鄧海山伏誅己巳賑莎車水災免直隸通州等處糧租雜課十一月乙酉朔  
免直隸通州等處通賦辛卯賑臺灣等處潦災辛丑諭李鴻章孫家鼐等察賑  
被災州縣有玩視民瘼者嚴劾以聞壬寅免江蘇各廳州縣衛通賦庚戌發庫  
帑十萬賑太原等屬水旱霜雹災癸丑發內帑二萬賑順直各屬災民十二月  
乙卯朔詔王大臣承辦皇太后六旬慶典會同戶禮工部內務府博稽舊典詳  
議以聞丙寅召劉錦棠來京丁卯再發京倉米四萬石賑順天災民乙巳懿旨  
辦理慶典一切撙節內外臣工例貢免進獻特頒內帑賑濟順直災區每歲準



此昇順天府直隸總督永濟窮黎每省各賞銀二萬自明年甲午始俱發內帑  
昇各省鹽吏散給之諭已故貝勒那爾蘇爲僧格林沁孫惓念前勞追封親王  
後不得援例內子賞徵寧池太廣道楊儒四品京堂充出使美日祕大臣是歲  
朝鮮入貢

十九年癸巳春正月乙酉朔詔以明歲皇太后六旬聖壽今年舉行恩科鄉試  
翌年舉行甲午恩科會試內戌免長洲等州縣冬漕米石己亥免長沙等州縣  
通賦甲辰詔明年應來京祝嘏蒙古與內札薩克王公台吉等除有年班外俱  
止來京癸丑以口外七廳及大同等府災命直管免收運商糧稅撥部帑十萬  
賑之二月戊午留江蘇漕米五萬石備賑安州等處戊辰見德使巴蘭德於承  
光殿癸酉留京餉五萬賑陝西北山等處災民三月辛卯命以兩湖漕米六萬  
餘石變價賑山西災夏四月丙子祈晴己卯以阿拉善札薩克和碩親王多羅  
特色楞游牧連年荒旱頒帑三萬賑之五月乙酉西北新倉火乙未以伊克昭盟  
長札薩克固山貝子札那吉爾第游牧連年荒旱頒帑一萬賑之六月乙卯命

直省擇保精曉天文醫理卜筮數學及嫻於堪輿者上之內務府戊午撥部帑  
三萬備賑醴陵等處災庚申見德使紳到於承光殿癸亥祈晴丁卯普安匪首  
劉燕飛等伏誅癸酉京師雨災詔於六門外等六處各設粥廠撥京倉米萬石  
充賑乙亥再撥奉天粟米江南北漕米備順直賑需永定河決南北汎並溢丙  
子免安徽積年逋賦暨潛山等縣衛前欠夏糧秋七月甲申諭順天府平糶甲  
辰近畿積潦漸消諭遣就食貧民歸籍八月辛亥賜故總督曾國荃孫廣漢四  
五品京堂除華僑海禁自今商民在外洋無問久暫概許回國治生置業其經  
商出洋亦聽之丁卯採購奉豫魯省雜糧分備順直賑九月癸未山東截留新  
漕六萬石賑瀕河州縣災民再撥江南北漕米十萬石改折復留江蘇漕米八  
萬石充賑順直分半給之癸卯發京倉米三萬石賑順天是月免陝西各屬逋  
賦及額賦冬十月己酉朔修太倉四州縣海塘壬子賞四川布政使龔照璠三  
品京堂充出使英法義比大臣己未命戶部歲納內務府銀五十萬乙丑免通  
州等處糧賦十一月己丑申私錢之禁有銷毀改鑄或載運者所司訪緝嚴治

之戊子甘肅新疆地震辛卯命許振禕與李鴻章會勘永定河甲午免大興等縣秋稅十二月辛亥命吏部侍郎徐用儀在軍機大臣上學習行走壬子詔京察嚴考覈戊午除內地人民出海禁辛酉賑安仁疫災壬戌免歸化等七廳租賦丁卯免烏拉捕束珠壬申撥京東倉米五萬石備順天春賑癸酉刑部奏革員周福清於考官途次函通關節擬杖流改斬監候

二十年甲午春正月乙卯朔懿旨六旬慶辰旨封妃嬪名號增恭親王護衛奕劻晉封親王醇親王載灃等賞賚有差自中外大臣文武大員蒙古王公等以次恩錫內中許振禕會勘永定河工程命與李鴻章會籌允歲增修費四萬並撥部帑三十萬充經費己亥庫車地震免鎮迪各屬通賦庚子重申科場禁例辛丑免鄂倫春貢貂壬寅滇緬續約成二月辛亥詔殿廷考試閱卷大臣公慎校取勿濫濬通惠河築閘壩甲子命李鴻章閱海軍甲戌禁州縣非時預徵及濫用非刑允許振禕請盧溝橋置河防局仿裘曰修成法設浚船百二十艘三月戊寅朔日有食之諭疆吏毋濫保屬官戊子詔停秋決是春免新疆各屬逋

賦雲南各屬額賦雜課夏四月戊申詔州南雄匪亂剿平之己酉激浦匪首譚北海伏誅甲寅大考翰詹擢文廷式等六人一等餘升黜有差辛酉見義使巴爾迪等於承光殿辛未賜張謇等三百十一人進士及第出身有差壬申諭直省清理京控積案丁亥以畿輔多盜諭嚴捕務戊子詔駐藏辦事大臣幫辦大臣三年任滿得請覲著爲令丁酉初朝鮮以匪亂乞師李鴻章檄提督葉志超總兵聶士成統兵往上慮兵力不足因諭綏靖藩服宜圖萬全尙須增調續發以期必勝壬寅除免江蘇海運漂沒漕糧乙巳召劉銘傳來京裁鄂倫春總管升布特哈總管爲副都統六月己酉詔停道府捐癸丑京師霖雨祈晴乙卯見日使小村壽太郎於承光殿戊午命翁同龢李鴻藻與軍機總署集議朝鮮事壬戌停海軍報效乙丑諭湖南京漕折價備順天賑向有濟荒經費亦報解存儲皆自今歲始歲以爲常丁卯命南澳鎮總兵劉永福赴臺灣戊辰召劉錦棠來京辛未上二旬萬壽御殿受賀筵宴命徐用儀爲軍機大臣壬申召免出使日本大臣汪鳳藻回國秋七月乙亥朔日本侵朝鮮下詔宣戰戊寅命李

毀南海舉人康祖詒所著書已卯諭遣道員袁世凱往平壤撫輯丙辰命臺灣布政使唐景崧南澳總兵劉永福助邵友濂籌防辛巳諭李鴻章擴充海軍慎選將才精求訓練通籌熟計以聞乙酉免寶川等州縣田租丙戌敕神機營兵防近畿駐通州旋移南苑戊子命端郡王載漪敬信練旗兵以滿洲火器營健銳營圓明園八旗槍營暨漢軍槍隊充選載漪尋管神機營諭停不急工程允吳大澂請統湘軍赴朝鮮督戰丁酉賑會同會樂二縣災己亥命葉志超總統駐平壤諸軍敬信汪鳴鑾均在總理各國事務衙門行走癸卯重訂中外保護華工約八月丙午吳大澂督軍出關自請幫辦海軍不許丁未始釋奠於先師己酉劉錦棠卒戊午上皇太后徽號頒詔覃恩有差壬戌李鴻章以師久無功褫三眼孔雀翎黃馬褂丙寅懿旨發內帑三百萬備軍需命四川提督宋慶幫辦北洋軍務丁卯命承恩公桂祥統率馬步各營往駐山海關戊辰奉天援軍統領高州鎮總兵左寶貴及日人戰於平壤敗績死之己巳命吳大澂軍駐樂亭庚午懿旨六旬慶辰停止頤和園受賀撥京倉米三萬石賑順天各屬水災

九月甲戌朔懿旨起恭親王奕訢直內廷管總署海軍署事並會同措理軍務  
乙亥命宋慶節制直奉諸軍罷葉志超總統丁丑諭在籍提督曹克忠募津勇  
駐山海關召王文韶來京調黃少春爲長江水師提督庚辰命兵部侍郎王文  
錦等辦理團練辛巳免陝西咸甯等處旱荒田賦壬午海軍副將鄧世昌及日  
人戰於大東溝死之癸未召張之洞來京丁亥賑瑞昌等縣潦災戊子以臨敵  
潰散罷葉志超銜汝貴統領以聶士成統兩軍庚子日兵渡鴨綠江辛丑陷九  
連城壬寅命長順率吉林軍往奉天助剿豐紳統三省練軍防東邊冬十月甲  
辰朔諭裕祿飭金州戰備乙巳命提督唐仁廉募勇二十營會定安裕祿防剿  
丁未詔山西各省入衛戊申詔恭親王督辦軍務各路統帥聽節制命王大臣  
等分辦巡防團防廣西按察使胡燏棻駐天津督糧餉許專奏召劉坤一來京  
以張之洞署兩江總督兼南洋大臣寧夏鎮總兵衛汝貴以臨敵退縮褫職逮  
問己酉命翁同龢李鴻藻剛毅並爲軍機大臣壬子日人陷金州副都統連順  
棄城遁徐邦道及日人戰敗績內辰賑東省瀕河貧民並撥帑撫卹丁酉各國

使臣呈遞國書賀皇太后六旬萬壽上見之於文華殿壬戌日人陷岫巖州豐陞阿聶桂林皆棄城走額勒和布張之萬罷軍機定安以臨敵無功奪欽差大臣漢軍都統暫留辦東三省練兵依克唐阿以督兵畏葸褫職戴罪圖功丁卯日人襲旅順船塢總辦龔照璵遁煙台黃仕林趙懷業衛汝成繼之徐邦道與張光前姜桂題程允和奔復州依宋慶諭李秉衡嚴防威海吳大澂請自任山海關防務並俟各軍會合規復朝鮮諭曰臨事而懼古有明訓切勿掉以輕心致他日言行不相顧以旅順失守責李鴻章調度乖方褫職留任壬申奪丁汝昌海軍提督暫留任宋慶自請治罪特原之詔各路將帥嚴約束禁擾累民間犯者立正軍法褫葉志超職十一月癸酉朔褫龔照璵職尋逮問己卯以金州陷褫副都統連順職程之偉並褫職趙懷業逮京治罪庚辰懿旨恭親王奕訢復爲軍機大臣辛巳免順直被水州縣額賦丙戌日本陷復州戊子日本兵集金復二州諭宋慶率諸軍決戰豐陞阿聶桂林自岫巖奔析木城聞敵至帥復潰日人取析木城以程文炳爲陸路提督己丑宋慶及日人戰於海城敗績退

保田莊臺庚寅依克唐阿及日人戰於鳳凰城侍衛永山死之命榮祿在總理各國事務衙門行走壬辰豐陞阿聶桂林逮問癸巳逮葉志超丁汝昌治罪戊戌褫提督程允和張光前總兵姜桂題職俱留營效力十二月癸卯停是月紫光閣保和殿筵宴褫提督衛汝成職逮問甲辰御史安維峻以論李鴻章坐妄言褫職戍軍台命劉坤一爲欽差大臣關內外各軍均歸節制褫提督黃仕林職逮問壬子命張蔭桓邵友濂以全權大臣往日本議和尋召還丙辰撥江蘇漕米十二萬石備順直春賑丁巳章高元及日人戰於蓋平敗績奉軍復戰提督楊壽山死之城陷辛酉懿旨劉坤一駐山海關籌進止趣吳大澂率師出關會宋慶進勦以近畿米貴運豫魯雜糧平糶癸亥衛汝貴處斬甲子命宋慶吳大澂襄辦劉坤一軍務乙丑再撥京倉米三萬石備順天春賑己卯日本陷榮成庚午命王文韶襄辦北洋軍務是歲朝鮮入貢